



## **ABARRAK**

### **Kirikiño**

Iturria: *Abarrak*, Kirikiño (Itziar Lakaren edizioa). Euskal Editoreen Elkarte, 1986.

Klasikoen Gordailuan:

<http://klasikoak.armiarma.com/idazlanak/K/KirikinoAbarrak.htm>

Klasikoen Gordailuak egindako lanak oro dominio publikokoak dira, eta, Jabetasun Intelektualaren Legearen arabera jatorrizko idazlanak bestelako eskubiderik ez baleuka, nahi bezala erreproduzi daitezke.

## Irakurlientzat uarra

Kirikiño

Ona emen, *Abarrak* deitu dautsedan irakuragaitxu oneik.

Egurgiñan sartu naz ni gure euzkera ederraren oyanian. Bertan ain ugari dagozan zugatz enbor-lodidunak eta euren besanga ta adar andijak ebagi ta gertatu ta ekartia ixango zan nire atsegiñik andijena; baña ezin, orretarako biarrak dira ba beso sendua ta azkora andi zorrotza. Nire besua ta azkorea, barriz, bata makala ta bestia zorbatzik bakua dira. Lan ori eziñik, zerbait orraitino egin gura ta, egur meiari, abarrari, ekin dautsot, eta besarkada auxe gertau ta ekarri dot. Al ixan dodana.

Egur me au be zetarako edo atarako bai-da. Su andija egiteko, egur lodija ixetuteko, lenengo abarrari ezartzen yako sua, ta onegaz ari gero.

Irakurgaitxu oneik be gogo askotan sortu leye euzkeraz irakurteko zaletasuna. Txikijak, meiak, arin-ariñak, errazak, barru gitxidunak, geyenak barre batzuk eragitekuak ixanik, euzkeraz irakurten bape zalia ezta-nak onakoxiak atsegiñez artu leiz, ta eurok, abarrak lez, bere goguan sua biztu.

Euzkera ziatzaren zalia ba'zara, urrian sarri musturra okertuko dozu irakurgaitxu oneitan aurkituko dozuzan erderatiko itz ugarijak ikusita; baña gogoratu eikezu eurok eztirala idatzi eun urte geruagoko euzkeldunentzako, ezta gaur euzkera ziatz-ziatza ta erdel-antz apur bat daben itz bakua jakin eta erabilli oi daben euzkeldun banakarentzako bakarrik be. Ez, eurok idatzi dira gaurko euzkeldun geyenak dakijen euzkeraz, geyenak irakurri ta ulertu al dagijen euzkeraz.

Irakurgaitxu geyenak lendik argitalduak dira izparringi baten edo bestian. Urte asko dala Bilbao'n, Azkue abade jaunaren artezkuntzapian agertzen zan izparringi asteroko eder -ederrian, *Euzkaltzale*'n, argitaldu



ziran: *Zerutar bat*, *Deun ixateko bidian*, *Azeri azartuak ollua darua*, *Aurrerapen ikaragarri bat osakuntzan*, *Itoxcurak zinaaldari*.

Geruago uri onetan bertan bijan bixi-ixan zan asteroko izparringi «Ibaizabal»-en argitaldu ziran: *Peru Makur*, eta *Azerijari Azerija*.

*Enzkadi* ingurtijan argija ikusi eban lenengoz onexek: *Garagarrillean edurra*.

Eta *Enzkadi* egunerokuan urten dira argitara: *Aratoste*, *Urte barri barri*, *Kukua entzuten*, *Zinaaldari arteza*, *Tximistargi barrija*, *Alkar aitu obe da alkar il baño*.

Amalau orrexek dira lenengokuak. Beste saspajak: *Gixon zurrak ondo erabagi*, *Baltz enzkelduna*, *Jatorra*, *Or dozu ospia ta betoz diruak*, «*Biarrak biarra eragin*», *Ardao-zaliak poltsia galdu*, eta *Atxuri'ko «Millagrua»*; barriak dira, orain arte argitaldu bakuak.

Irakurgaitxu oneik geyenak jazorikuak dira; batzuk antxiñakuak, nik neure aitari entzunak, eta berak bere aitari; beste batzuk neuk batu dodaz or-emen neure aldijan; beste batzuk neuk asmauta be bai-dira, gus-titara.

Or dozuz ba, irakurle, ta eztautzuela gogait eragingo ba'leki, poz-pozik geratuko litxake, ta zeuri eskarrak egiñik, euroen egille

## Zerutar bat

Nik orain gomuta eztodan etxaguntza baten bixi ei-zan bigarrenez eskonduriko emakume bat, buru-barruba utsik edo beñik-bein ondo beterik ezeukana bera, irakurliak igarriko daun lez.

Agertu yakon bein ate-onduan eskeko bat, bere soñekuak zarrenzarrez danak triskilduta, alde gustijetatik zulatuta, oñetakuak abua zabalik barreka, buruko txapela be koipez beterik, erdi-erdijan leyo biribil bat ebalat, bertatik ule pillo bat agiri yakola. Bere arpegi, ule, bixar ta makillaraño-gustijak, danak ziran soñeko, oñetako ta txapelaren antzekuak; arlote andijagorik, amesetan be, iñok eleuke sortuko irudimenian. Arriturik ikusi ebaneko, itandu eutson emakume arek:

— Ene! Nundik urten zara era orretan? Nundik zatoz?

— Zeutatik, andrea —erantzun eban Arlote'k.

— Zeruetatik zatozala? Zeruetatik esan dozu?

— Bai andrea, andixek nator.

— Aitearen da Semearen!... Ondiño alakorik! Orduan, biarba, ezautu ixango dozu Juane guria.

Auxe zan bere lenengo senarraren ixena. Espetxe nagositik etorran azeri zarrak laster igarri eban zelako *lelantoni* eukan aurrian, eta, badaezpadan, jarraitu eutson onen oker-aditziari.

— Ezautu ez oster! Bai ta... aizkide andijak gara.

— Ene ba! Ta zelan dabil bera? Ondo bixi da?

— Gitxi gora-bera neu lez. An ezta oi beste bixikerarik. Danak arlote, danak zorriz, ardiz, soñeko zarrez ta nekez beterik.

— Ai ene Jaungoikua! Juane koitadue! Nok uste ixan biar olakorik? Bigurtuko zara bertara barriro?

— Bai, aldi andirik ezta igaroko ni ara jua orduko, uste dot beintzat.

— Orduban eruan biar dautsozuz gauzatxoan batzuk, nire bijotzeko Juane ain txarto bixi ez dadin.

— Bai, bai, pozik be; ataraizuz, ataraizuz gauzok.

Atara ta emon eutsozan ba, diruben batzuk, soñeko barriak toloztuta maletatxo baten, eta ganera gorantzi andi ta ugariak Juane koitaduentzat.

Zerutarrak alde-eginda gerotxuago, agertu zan nundik-edo-andik emakume aren bigarren senarra. Emaztiak esan eutson:

— Bakixu? Juanen izparrak gaur euki dodaz.

— Arranua! Nundik artu dozuz ba?



— Oraintxe emen egon dan gixon bategandik; izpar txarrak ekarri dauz.

Azaldutso gero senarrak zelan emon eutsozan Juanentzako, esan diran gauzak. Au entzun orduko itandu eban gixonak:

— Norantza artu dau izpardun orrek?

— Andixe bidetik; zer zuaz egiten?

— Ba... Juanen barri jakin gura dot neuk be ta, jua biar dot izpardunagaz itz-egiten.

Atera eban kortatik zalditxo polit bat, ganera igon, eta tximistea baxen arin aldendu zan.

Baña Zeuta'ko espexetarrak arima zarra euki, ta otu yakon, batenbat urten litxakela bere atzian; eskutau eban maletatxua sasi-arte baten eta jezarrri zan bidezabaletik urtetzen zan bide zidor baten asijeran.

Zaldidunak, eldu zanian, itandu eutson arlotiari:

— Aizkidia, ikusi al dozu bide onetan maletadun gixon bat?

— Bai, bide zidor onetatik artu dau, baso sarratu erditik gorantz.

Oñak bizkor daruaz berak, eta bere billa ba'zuaz, errezkari arin ibilliko zara.

Basua etzan zaldiz ibiltekoa, ta bere esturan senarrak emon eutson bestiari aberia, esanaz:

— Mesedez, zaldi au eukiko daustazu apur baten?

— Bai, zuaz ardura barik emen itxarongo dautzut.

Alde-egin eban leluak; atara eban Arlote'k maleteta ta zaldijari igonda, ariñari emon eutson pozarren.

Bestiak barriz bota biar zituan gibela abotik mendi artako baster gustijak arakatu biarrez, batera ta bestera, atzera ta aurrera, gora ta bera; azkenian arnas-estuka, nekatuta, ixerdituta, bigurtu zan zaldijaren eske, ta arrizkua lez geratu zan iñor ikusi ezebanian.

Ulertu eban gustija, artu eban eruapena, ta jua zan etxera lotsatuta.

Emaztiak eldu zanian:

— Da, ikusi dozu?

— Bai.

— Eta zaldijari zer egin yako?

— Emon egin dautsot Juaneri eruateko, biarbada guk baño aren biar-ixan geyago euki lei ta.

— Ai zu lango gixonik eztago ludi gustijan. Zorionekua zugaz eskondu nintzan ordua!

## Deun ixateko bidian

Basetxe baten ei-eguan (antziñe) egundo elexara izan etzan mutil bat. Bere ugazabak bidaldu eban bein Meza-entzuten; eta elexia nun aurkitzen zan ezekijan lez, esan eutson lagun asko sartuko zan etxe andi batera juateko.

Jatzi zan ba kalera gure mutil ori, ta eldu orduko ikusi eban estegu andi bat elexatik etxerantz joyala, gomutau eban ugazabaren esana, batu zan esteguaz, ta sartu zan danakaz eskon-barrijen etxian.

Iñok be ezeutson ezer esan, senide edo auzokoren batek beragaz ekarri ixango ebalakuan, jarri zan mayan, eta ederto bete eban sabela ongo jan-edari ugarijekaz.

Pozik bigurtu zan etxera, ta aste gustija jua yakon bere ugazabaki itanduka ia igandia noz etorran. Ugazabak erantzuten eutson:

— Mutil, etorriko dok. Itxuraz ondo ibilli intzan, orrenbeste gurari adirazoten dokan ezkerro barriro be juateko.

— Bai ondo ibilli! ño!... estuen nago igandia eldu arte.

— Kristiñau gustijak orrelakoxiak ixan biar layeukiek. Asko ta asko yagozak, mutil, Mezatarako beti nagi aurkitzen diranak, beste gauzetarako bizkorrak ixaten dozak baño.

— Enaz ni ba arretarikua. A zan atsegiña nik euki nebana igandian! Eta, jente nagija dagola ain gauza ederrera diñozu? Ziñestu be ezin leiteke.

— Mutil! ori dok, ori, kristiñautasuna: ua, ua, bide orretatik, eta neuk dinokat deun andi bat ixatera elduko azala.

Larunbata gabea, amesetan egin eban mutillak, okela-zati, bixiguerre, ogi-zuri, gaztae, pitxerkada ardao ta beste onelango gauzakaz. Itzartu zaneko urten arin ogetik, arrapataka jantzi ta bizkor kalerantz, abo gustija gozotuta, gora-goraka atsegiñan atsegiñez.

Kalera eldu zanian, entzun zan Mezatarako azkenengo txillin-otsa, ta agaitik ikusi eban jentia arin elexerantz; berau be arin-arin jua da sartu zan erdi ingururaño. An gelditu zan begira alde gustijetara, ta ikusi ebanian etorten ziran gustijak ur bedinkatu-ontzijan sartzen ebezala euren eskuak eta gero arpegira edo (berentzat) abora eruan, ariñeketa baten jua zan bera be, ta beso gustija sartuta ibili zan la zatijen bat aurkitxeban, baño alperrik, an saldea baño besterik ezegualako.

— Ederra jokatu yaustiek! esan eban agin-artian.



Geratu zan gero baster baten ixillik eta adi; ta izkaldija asi zanian alde-egin eban gogait eginda.

Etixeratu zanian, bai-diñotso ugazabak:

— Ona emen gure kristiñau zintzo au be, zintzorik ba'dago iñun!

Mutillak arpegi illundubagaz:

— Gaur ederrak emon daustiez.

— Zer ba? Jo egin abe ala? Ta zegaitik? Mezatarra juatiagaitik? Zorionekua az, gauza deunakaitik nekiak igaroten asi azalako; esan neuan nik deun andiren bat ixango intzala, jarraitxen ba'eutsokan asiriko bidiari: Eta, zelan ixan dok?

— Berandutxu eldu naz gaur bai, ta saldea baño besterik eztauste itxi. Itxaron dot gero puskatxu baten, baño ezer bereez. An aurrian iru gixon, saku antzeko gauza batzukaz jantzita, ibili ta ibili batera ta bestera, nik eztakit zer egiten; beste bat ostera sabai-ganian iru milla txilibitu joten; alkarrri didar bat edo beste egiten ixan daustie, ulertu ezin leikian eraz; geruago igon da beste bat lexibontzi baten ganera, ta asi da agiraka ta didarrez gustiz asarre. Auxe ikusi dodanian: «ezer artu ez da nik zegaitik entzun biar yuadaz ba olango demoniñokerijak?» esanda, alde-egin dot. Urrenguan, enaz azkenen juango.

— Bakik nora juan biar dokan ik?... Kortara!... antxe daukak lekurik egokijena, astotzar arrayo orrek. Eztausku azkenian *deun* txar txarrak urten mutil eder onek!

## Azeri azartubak ollua darua

(Jazorikua)

Errijoja'ko uri txiki baten alkar topau eben bein erri bateko euzkel-dun mutil bik; bata gaizto samarra, ezegaitik ikaratuten etzana, edozein esturan urteyerea laster asmetan ebana, bide onetik naiz txarretik; bestia barriz on uts bat, iñori kalterik egin baño lenago gosiak ilgo leukiana.

Ezta zegaitik esan zeinbat poztuko ziran alkar ikusita; erbestian iñoz bakarrik ibilli danari ezta zegaitik, jakingo daulako zelan nasaitu ta bigunduten dan bijotza erritar bat aurkituaz batez-be antziñeko ezaguna ba'da; euzkelerrijan edo euzkeldun-artian beti bixi ixan danari be ezta zegaitik, bijotzari dagokijozan gauzak eztralako errazak azalduten, eta aditu erazoten bez, ondo adituteko sentidu egin biar diralako.

Baña aldendu gaitez adarretatik eta guazan gerrira. Gure mutillak, ba, alkarrri agurrak eta laztanak eginda gero, asi ziran autuan era onetan. Esan eutson okerrak otzanari:

— A mutil, nundik nora abil? Ze biximodu darabik? Nora ua emendik?

— Ibili nok Gaztela'n lan-billa, ta ozta-ozta gosiak ez ilteko beste aurkitu dodanian, Goikua'n eskarrak; eta beraz, orain etxera nayuak. Eta ik, ze bide daruak?

— Neuk bañekik! Ugazaba galduta dabillan txakurra lez nayagok, nora jo eztakidala; aspaldijan etxuat euki lanik, eta etxaukuat nun sartu, zer jan, ta etxakiat zer egin be; augaitik zerbait emotia mesede egin biar daustak, gitxi ba'dok be. Errira uanian, eskatu eyoek neure gurasoei ta an kitatuko az.

— ai, ona nayagok ezer emoteko! Artzeko ixan ba'litxok...

— Zer ba, diru barik ago ala?

— Txakur txiki bat edo bi, geyen.

— Au dok ixatekua!... Onak gayagozak!... Ba, zeozer asmau biar yuagu, mutil; bestelan galduak gaituk.

— Bai asmau! Zer asmauko yuagu ba?

— Zer arrayo! gayuazan ostatura bai, ta aparija eskatu ta jan yaiguan, eta gero atara daiskubela urdallian sartu doguna.

— Ik beti ixan biar betikua. Alan jango yuagu, baño kartzelan sartuko gayoezak; eta nik, lotsarijen ganian, etxerako bidia galduko yuat. Ez, ez, ni enayuak orretara.



— Dana dala, obe dok kartzelan apalduta egon, kanpua gosiak illik baño.

— Ez, ez olakorik mutil; onena ixango dok jarraitutia bakoetak bere bidia, eskatu Jaungoikua'ren ixenian ogi zati bat baño ezpa'da, ta ia elduten garean ni neure etxera ta i lana aurkituko dokan lekuren batera.

— Lelotzar ori! Bildurta ori! Ator neugaz, ta ezadi ezeren bildur ixan, neuk jabe urtengo yuat eta. Txarrik etorten ba'dok, esango yuat ik eztaukala errurik, neuk dana ordainduko nebalakuan etorri azala.

— Baña mutil...

— Ze mutil ta zer arrayo! ator bein, eta ezadi ain olluaxan.

Juan ziran ostatura ba, apaldu eben ederto, beñipein bata, bestiak ez ainbeste, eban bildurraz.

Apal-ostian ekin eutsen barriketan bertan egozan gaztelar mandazain batzukaz, ta autubaren azkena ixan zan musian jokatzia gure mutil bijok beste mandazain biri.

Lenenguan ardua bakarrik jokatu zan, mandazañak galdu ebala berau, ta onek zerbait berotu ziran arrotxuak bai-ziran ta; jokatu eben gero apartija ta gau artako oge-sarija, irabazliak ixan zirala onetan be euzkel-mutillak.

Asarratu yaken auxe mandazañai, ta euren barru gustija irakiten eukela itandu eben ia diruba jokatu gura eben, eta mutil okerrak ausardi andijaz «bayetz» erantzun eban. Beste gixagaxua barriz Gokaxoki edo Purgatorio'ko bat irudijan, larri-larri, abo gustija legortuta, ikara-ikara ta berentzako iñuala:

— Au languakaz batuten danak, berak daukaz erru gustijak. Nori burura etorri lekijo bijar arteko ostatuba eskubetan euki ta diruba jokatzia, sakelian txanpon bat euki ez ta? Jaungoikuak obia, naste ederrian sartzen guaz!

Ain larri eguan, apal-apal esan eban obe ixango zala jokua iztia, baña lagunak erantzun eutsen:

— Euk gura ezpa'dok dirurik jokatu, neuri laguntzia baño besterik eztaukak; galdu edo irabazi neuk bakarrik egingo yuat.

Itundu eben joko bakoetak laurleko bat balijoko ebala, ta orrexegatik dirurik atara barik ez batzuk ez bestiak, lengo babakaz jarraitu eutsen zorijoneko jokuari. Oi dan lez, ixan ziran jokuan gora-berak, baña azkenian mandazañek galdu eben ainbat laurleko, ordaindu eben galdu ebena ta ogeratu ziran danak.

Bijaramonian banandu eben diruba mutillok, eta agur alkarri egiteko gozala iñotson mutil onak bestiari:

— Ik egiten dokazanak!... Nik igaro nayuazan larrijak bart!... Ezkeunkan ba naikua apartija ta ostatuba irabazijaz? Zertarako sartu diru nastietan? Zer egiteko galdu ba'geiduk? Orixe dok bene-benetan, egaiz dabillan saya artziarren eskuko txorijari aindutia.

— Ut, etzarie, ezetako be ta, lelo ustelok! Nik etxakiat zetan urtetzen zarien amandrien gona-artetik, arra beteko uretan itoten zarie-ta.

— Bai!... Ba, alan jazo ba'litxok, etxakiat en be zetan ibilliko intzan, eure azartasun gusti orregaz.

— Zelan ibilli...? Ibilli eza! Asarria jokuan ataratia gauza erraza dok, eta zeren edo aren ganian laster urtengo zuan matrakea, ta au neuk eruan-go nayuan burrukaraño ainbat ariñen, eta argi ta edontzi ta pitxer ta mai ta bastar gustijak aidian ibilliko zuazan, olango jazokeretan ixaten dan lez. Gero...

— Gero... guk ederrak artu biar, gu baño geyago ziralakoko, ta ganera kartzelara...

— Ze kartzelara gero? Ni asiko nintzuan orduban didarrez neu niñoyala alkatiagan egundoko ariñen, ango nastian gerrikotik poltsea ostu eustela ta, an lapurren batzuk gozala ta...

— Mutillak!

— Ikaratuko nayuazan apurren bat, ba ostatu-jabiari olango gauzak etxuakazak ondo, ezta mandazañai be euren bidia atzeratuteko gauzarik; eta neure asmuaz urtengo gintzuazan ezer be ordaindu barik gitxienez, ganera eskupekoren bat ixillik egotiarren atara ezpa'geinduk.

— Ezau i arin gosiak galduko, daukuzan azerikerijekaz!

— Zer egingo dautsok ba? Gibelak euki biar ixaten dozak errimiak basterrara urteteko; itoten dagona ezin dok ibili begiratzen albuan agiri dan untzia gorituta dagon ala ez.



## Aurrerapen ikaragarri bat osakuntzan

(Jazorikua)

Beñola Madrid'eko akeitetxe bateko mai baten inguruban batzen zan ikaslari edo *estudiante* pillo bat, euren artian lagikari-geyak eta osalari-geyak zirala geyenak, danak *vascongaduak* bi edo iru *euzkeldun* kendu ezkeru.

Esan biarrik eztago barriketea eurrez ibiltan zala batzar artan. Gau baten atara eben osalarijok eta lagikarijok matraka galanta, areik euren ogibidiaren alde, oneik eurena goratu biarrez, bide batez alkarri iñun diran txakurkerijak arpegira jaurtinda.

— Zubek drogeaz bixi biar izaten dozube ta...

— Zubek, ostera, osagai berenezkuekaz ta gañibeta antzeko tresna-kaz zenbat gixajo ez ete-dozube bidaltzen beste aldera...!

— Lumadun gixonak erpe geiztokuak; ludijan drogarik ezpalego, lagikarijak gosiak illik.

— Zubek aña edozein atsok daki; juaten zare astozar bat baño motzago oe-ondora, artu an dagonaren eskubiterra, burubari alde batera ta bestera eragin, ipiñi papel txatal baten urrengo burura yatortzuben txarrikeriren bat, lan-sari ederrak kendu, ta or konpon, osatzen ba'da ondo ta ilten ba'da, lurra emon dayoela ta kitu, zuberi zer?

Onakoxe irain garratzak alkarri jaurtitera eratzu eben euren eztabaidea.

Alboko mayan egoten zan zaldun urtetsu bat, ule ta bixar zuriduna, koronel zana edo ixana, morroiak esaten ebenez; ikaslarijak arpegiz ezau-na eben eta agur egiten eutsoen bere maira etorri edo kanpora juaten zanian, akeitetxian auzokuak ziralako aspalditik.

Gastien eztabaidea garratzuten asi zanian, jagi zan alako baten zaldun ori ta begirune andijaz esan eban:

— Iñok deitu eztaustan lekura nator, eta azartu naz orrenbesteraño, ustia dodalako parkatuko daustazubela, bada nik zuben aita ixateko beste urte dodaz, zer-edo-zer alkar ezagutzen dogu, ta neure bixitza luzian gauza asko ikusita nagonez, argi apurren bat ekarri daiket zubek darabil-tzuben eztabaidara.

Mutillak kapelak erantzi ta euren erdijan jezarri eragin eutsoen esanaz:

— Jauna, eztaukazu zetan parkamenik eskatu, geuk dagitzuguz eska-rrak etorri zayakuzalako.

Aguriak eta ikaslarijak alkarri labankeri andijak eginda gero, asi zan a itzaldi bat egiten, gustiz polito, danak poz-pezik entzuten eukazala aora begira.

Lenengo azaldu eban lagija zer dan, onen jatorrija, bere biar-ixana ludijan, zenbat eta zelako onurak dakaskuzan, eta azkenez, zein goratubak ixan biar eben lagijak ikasi ta aztertuten dabiltzanak, baita eurak gorde edo jagoteko ixentauta dagozan gixonak.

Gero, osalarijen aldez be gauza gustiz ederrak esan ebazan; osasuna dala gauza bat bera galdu arte eztagiguna daukan balijua; osakuntzeak egi-ten daula, ez bakarrik gexotasunari igesi eragin, baita gatxa ekarri leiken gauzea ondo ezagutu ta aldendu eragin be bai, *Higiene* deritxon zeraz, eta alan aberrijak edo naziñuak osasuntsutu ta gogortu, ta edozein aurrera-penetako gertu ipiñi, gauza jakiña dala ba osasun bagako errija, ez inda-rrerako, ez adimen gauzetarako daukela ganorarik; eta onetariko asko esan ebazan jas andijaz.

Mai arek irakastola bat irudijan orduan, eta irakasle bateri legez entzuten yagokozan adurra darijola mutil gastiak aguriari, papau batzuk legez.

Jarraitu eutson onek bere arluari gitxi gora-bera onetara:

— O, arrigarri ta entzungarriak dira ixan osakuntza gauzetan urtio-kaz egin diran aurrerapen, iñoiz amesetan be gogora etorri etxakiezanak gu baño lenagokoei! Ainbestian dirala-ta, azaldu biar dautzuben zuben baïmenaz, ain ardura andiz entzuten zagozen ezkeru, neuk Paris'ko gexo-tegi baten ikusi neban osakuntza bat.

— Bai, bai, pozarren entzungo yatzu, jauna; jarraitu egixu —iñotso-en mutillak.

— Tira ba; eruan eben egun baten gixajo bat istar-adurra ausita, burdi andi baten txirringeak azpijan artuta edo; gexotegi artako osalari nagusijak eta bere urrengokoeak arduraz begiratu ta ikusi eutsoen istarra gixon ari; gero asi zan bakotxa bere eretxija edo aburuba adirazoten eta geyenak, iñoen ankea kendu biarko yakola bixija atara gura ba'zan; nagsijak orduban onetara itz-egin eban:

— «Istarra ebagiteko astia gero be eukiko dogu-ta, bada ezipadan lenengo ikusi biar da neuk aspaldijan daukodan uste bat; gixajo au anka bagarik bertan-bera isten ba'dogu, ilgo da, ankeaz, biximodua kenduko dautsogu-ta.»

Uste ori ixan zan ondatuta eukan istar-azur atala kendu, ta orde z ipiñi txakur andi baten azurra, abe edo zugatzai mentua ezarten yaken antzera, ta ikusi ia oratuten eutsen azurrok alkarri.



Egin zan ba, ta eztago zetan esan zein ederto zainduko eben gexua osalarijak; bai-joyazan egunak, eta geruago ta obeto joyan gixona, istarra osatu yakon azkenian, oetik jagi zan eta ondiño makal, baña ankea lurrian ipinten eban, mentua lortu zan, beste biar-ixanik ezeguan indarra artutia baño gixona osoro geratzeko.

— Orrek dira gauza miragarrijak ikusten doguzanak gaurko egunetan! —iñoen arrituta gastiok.

— Baña, gure gorputzian, atal gustijak bardingeak ixan arren, ain alkartuta dagoz danen artian gauza oso bat egiteko ze, batak ezer daukonian, bestiak, danak ezpa'dira be, batzuk beñipein, sarritan okertu ta moteldu ta gexotuten dira; au da osalarijak konplikaziñua esaten dautsena. Auxe jazo zan an be; guntzurrunetara ta puxikara jo eban gatzak, ezin eban txixik egin, puxikeak estanda egin biar eutson gixonari ta bixija galdu biar eban, laster osabideren bat artu ezik.

Osalarijok ebiltzan gau ta egun zoratu biarrez, zer ete-zan ezin igarritu, liburu gustijak aratuaz ia zer alkartasun eukan azurretako gatzak guntzurrunekaz; itxaropena galtzen asi ziran, ezekijen zer egin.

— Da, il zan gixajua?

— Ez; dei egin eutsoen beste osalari entzute andidun bati. Onek itandu eban zer eukan eta zer egin yakon; azaldu eutsoen gustija; ta erantzun eban: «ia ekarrixube ona gixon ori»; eruan eutsoen ba, ta besotik eldu ta orma-ondora eruanda agindu eutson:

— «Altxaixu ankea gora, ia txixik egiten dozun.»

Parra-parra, ederto egin be. An egozan gustijak ikaratu ziran, eta benetasun andijaz esan eban osalari ospatsubak:

— «Txakur baten azurra ipiñi dautsozuben ezkerro zelan arrano gura zenduben ba gixon onek bere biarra egitiñ, ankea jaso ezik orma baten ondora urreratuta?»

Au entzunaz asi ziran gastiak barreka, ain benetan, eurai bai txis-eragin eutsela aguriak bere ipuiñaz. Berau osterata piperra baño benago edo serioago geratu zan.

Berez gogo onekua zalako edo, mutillak bakian ipintiarren edo, ezekijen onek zegaitik alango gixon urtetsu agurgarri bat juan yakon barre-garrikeri aregaz.

## Peru Makur

Peru Makur, agure gixajua, zarren zarrez ezetarako gauza etzalako, emendik destaña, ortik bekoki illuna, andik agiraka garratza, ta beti gosiak illik, gustiz txarto bixi zan bere seme ta erranagaz, eurok etxeko txakurrari aitari baño jaramon geyago egiten eutsoela.

Ain atsekabez ta ain errukigarri bizi zan aguretxuaren belarrietara eldu zan bein albista edo izpar au: Erregeri lapurretan egin eutsoela, txingido edo pitxi eder asko ostu eutsoezala, ta sari andi bat abinduta eguala lapurra nortzuk ziran agertzen ebanarentzat.

Peruk bere kolkorako egin eban: «Araxe Juan biar yuat, eta iru edo lau eguneko jan-edana eskuratuko yuat edozelan be, ta gero zuzitu nagijela gura ba'yoek, niri zer? zer galduko yuat ba? Ez asko. Gaur darabildan biximodua baño erijotza berbera asko txarrago eztok-eta.»

Esan eta egin, itzi semia ta errana (pozarren onek aguria etxetik aldendu yakenian), artu Errege-uriko bidia, ta bai-yuan txairo ta bizkor gure Peru, bere baserritar jantzi zar ipingitsu nabarraz, Jauna'ri erreguka alik ondoen atara egijala arazo artatik.

Errege ta onen inguruko aurrera agertu zanian, bere arpegi tximur zimela ta bere soñeko marroxak ikusi orduko asi ziran gustijak barre purruztadaka; batak iñuan: «Zer dakarkaiku zar onek ona?» Bestiak: «Au, bere erri koskorreko txiñel nagosija edo-da.» Onek: «Gixonak, *astronomu* onek ixarrai begituta edo igarriko dau, ta katalajo andi bat ekarrijozube!». Arek: «Eskuma-aldra nundik nora dan ete-daki gero beronek.»

Txorijak mozollua erabilli oi daben lez, irri ta barre erabillen gixajua. Erregek, orraitioño, barreka-barreka esan eutson: «Aitaita, adorerik bai al dozu artu dozun zeregiña bide onera eruateko? — Bai jauna, erantzun eban, emon bekit iru edo lau eguneko epia, ta zerbait egingo da. — Baita emongo yatzu epe ori, ta oraintxe aginduko dot neure jauregiko eskaratzeko morroyak jandedan emon dagitxubela.

Juan zan ba Peru Makur eskaratzera, zokondo baten maitxo bat ipiñi eutsoen, eta morroi batek bazkari ederra eruan eutson; argitu yakon gogua aguriari, ta urdalla ondo bete ebanian esan eutson bere burubari, bazkari bat arrapau ebalagoraturik:

— «Bat orraitik, eskuban yaukuat, onek etxaustak igesi egingo». Morroya adi-adi ta zurt begira egon yakon zatitxo baten, eta lagunakana eldu zanian, zurbil eta arnasa barik azaldu eutson aguriari entzunikua, ta





ikaratu ziran gustijak, eurak ziran ba lapurrak eta. — «Agure kaiku orrek igarri egin ete-yauskuk ba? Aparija beste batek eruan dayola, ia zer urte-ten dan.»

Alan egin eben; orduban be aguriak aparija amaitueran esan eban: «Bi jausi dozak; bijar ta etsi jausiko dozak bestiak be, ta enayuak ain txar-to». Aguriak esakun onetan janaldijen kontua erabillan.

Morroya juan zan arin bestiakana ta esan eutsen:

— Arrayia mutillak, guriak egin yok, galdubak gaituk! auxe ta auxe esan yok agure demoniño orrek, dana jakik.

Larritu ziran mutillok, eta azkenez itundu ziran aguriari itz egin biar yakola ta beragaz aitu, ia onian zuzendu al eitekian zoritxarreko arazo a. Urreratu yakon ba aguriari morro yen artian buru egiten ebana, ta autor-tu eutson eurak zirala Errege'ri ostu eutsoenak, eta gertu egozala atzera emoteko ostu ebena; baña, Jaungoikuarren, ezegixala salatu, bestelan urkamendira biar ebelata; Peruk esan eutson ezeren bildur ez ixateko, ardura txikijenik barik lo egiteko, ezetara be ezebazala agertuko ta.

Bijaramonian Peruk eruan ebazan Errege'n aurrera txingi edo pitxi gustijak, Errege ta bere ingurukuak aitiarenka izten ebazala. Ak itundu eutson Peru'ri:

— Eta lapurrak, nortzuk dira ba?

— zin esan neikijo, jauna; neure itxa emon dautset eztodazala ager-tuko-ta.

— Baña zuzentasunak aginduten dausku gaizkiñak zigortau egin biar dirala.

— Egi andija da ori, jauna; baña damututa dagozan ezkeru, osturi-kua bigurtu daben ezkeru, Errege gustijen Erregeren parkamena dauke, ta, ak parkatu ezkeru, berorrek be parkatu begijoe, jauna.

— Eztago txarto esanda, ta bai poz andijaz, aitaita, parkatzen dau-tset. Orain beste gauza bat igarri biar daustazu: nire emaztia laster sein-egiteko dago, ta esan eiskuzu mutilla ala neskea ixango dan argitara urte-teko dagon seintxua.

Peruk erantzun eutson Erregiña ikusi biar ebala orretarako, ta areto edo *saloi* andi zabal baten, lagun aldra andi baten erdijan Peru Makur gixa-jua estu ta larri eguan zer esan ezekijala; baña zer-edo-zer esan biar eban ta, eskatu eutson Erregiña'ri mesedez ibilli eitela alde batera ta bestera areto artan; ibilli zan ba, ta Peruk esan eutson Errege'ri:

— Jauna, gauza zalla da igarten... enago ziur; aruntza doyanian muti-lla iruditzen yat, onuntzakuan ostera neskea. Peru'ren zorijonerako, andik iru edo lau egin barru Erregiñak ume bi egin ebazan, bata neskea ta muti-

lla bestia. Nok adirazo an ixan zan arritasuna? Nok azaldu noraño gora-tuba ixan zan Peru Makur kaikuaren jakindasuna? Len barre purruztada-ka artu eben agure zimela, orain Seneka berbera euren artian agertu bai-litzan, lotsa ta itxal andijaz begiratuten eutsoen.

Larri eguan baña gure Baserre, Errege ta enparaubak au ta ori ta bes-tia igarri egijala-ta asiko yakozala, ta bide onetan laster jausi biar ebala ikusten ebalako.

Alantxe, berak uste ixan eban lez asi yakozan, eta Peru'k bere larri-aldijan urteyera polit bat asmau eban; Errege'ri sermoitxo bat zuzendu eutson, bertan beste gauza askoren artian inotsola:

— Gogoratu egikezube, jauna, nik neure ezin ixan dodala euki inda-rrik edo *virtute*rik egin dodazan gauzak egiteko; gogoratu egikezube, Jaun-goikua'gandik euki dodala indar ori, eta Jaunak biarrixana danian bakarrik emoten dau la bere eskarra edo grazija, ta ez gixonen jolaserako; ez Josu Gure Jaunak ez bere jarraile ixan diran santubak egin dabe inoz miraririk munduaren jolasgarrirako; enaz ni santuba, baña ori gorabera, santuben bidez mirarajak egin dauzan lez, ni pekatari onen bidez Jainkuak berak egin dau zubek nigan ikusi dozubena, ta orain jolasbidian igarkixunakaz asten ba'gara, Jainkua zirikatzia ixango da, ta pekatu lotsagalduko ori egin baño len, obe ixango da ni neure etxera juatia, berorren baimenaz.

— Gixona! —erantzun eutson Errege'k— igarle ona zara baña etza-rra sermolari txarragua. Bai, zuzen zagoz. Ederto esanda. Eutsi ba zeure zartzarua ainbat ondoen igaroteko lain, eta zuaz Jainkuaz.

Au esanaz batera, Errege'k zizkukada urria emon eutson. Bigurtu zan aguria baserrira, ta seme, erran, loba, lengusu, ta laugarren edo bos-karren mallako senide gustijak, auzokuak, erritar gustijak txiki ta andi, danak alkarren leyan, berari eder-egiten eutsoela (*zizkukada urriaren milla-gruak*), estula baño zarrago egin arte ederto bixi ixan zan Peru Makur agure zolija.



## Itoxurak ziñaldari

### I

Prakerre ta Motrollo esan, eta txakurra ta katua esan, Arribil'tarren-tzat gauza bardiña zan, ain zan andija arek euken alkar ikusi eziña.

Ezin ixaten eben alkar artu ezetan be; naikua zan batak eguna zala esatia, bestiak gaba zala esateko; beti batak bayetz eta bestiak ezetz. Pelota-jokuan, eta bolalekuban, eta karta jokuan, eta auteskundietan, edozetariko jokotan aurrez-aurre beti aurkitxen ziran. Errikuak esatebenez, ardandegijan bertan be, batak ardao zurija eskatzen ba'eban, bestiak ardao baltza. Alkarren onduan, urrumaka ta uliak astinduta otso bi lez egon biar beti.

Euren tayu ta ixakeretan be ezin ziran ixan bardingeaguak. Prakerre, txakur jezarrri bat baño andijagua etzan; gorputzez argala, samaz luzia, arpegiz estuba, sudurra luze ta makotuba, begijak txikijak eta barru-barruban sartubak, bixerra mietza, ta buruba txikitxua. Bizkorra zan bera, dantzari nekegabia, barritxu andija, itz utsa; pirri nausijenetaikua, leku gustijetan lenengua beti ixan gura ixaten eban, eztabaida danetan orijuaeren antzera berak igon biar iñok baño gorago, ta onetarako bere indarrak laguntzen ezeutsoenez, gibel gaizto ta demontretakua zan, eta bada-ezpadakuan, aizto luze bat gerrikuan erabilten eban.

Motrollo, barriz, erraldoe andi ta zabala zan; burutzar ikusgarrija eban, ule zapa baltz sarratu bategaz estalduta kokotetik asi ta begijen urreraño; bepurubak, matrallak, sudurra, ezpanak, andi ta trauskillak eban, sutegiren baten mallukadaka egiñak irudijela. Bixerra be sarratuba, buruko ulia lez; azala, baltz gorrizkea, begirada itxala, abotsa lodi ta astuna. Oso indartsua zan; itzak, gitxi ta neurtuta lez jaurtiten eban; matrak nekez asten zan, baña bein asi ezketiño, itz asko egin baño lenago bere besoetako gabi astunak erabiltzen eban, eta orduban bildurgarrija zan.

Mutil txikitxuak zirala erne zan euren artian gorrotua. Zetatik? Batek-baki!

Gixonen bijotzetan azi txarra ernetia ezta arritxeko; euretan landara gaiztuak ain erraz ta ugari urtetan dirala ikusirik esan leike azi barik berez jayoten dirala, edo bertan dagozan erro zatiren batetik dakarrela jatorrija. Azitik ba'datoz be, nok galerazoko dautso azijari norberen soluan jaus-

ten? Aixiak dakar, edo urak dakar, edo aberetxuren batek dakar, edo baidator arerijua gabaz ta ereiten dau.

Gero, jayo daitezanian lanak egin biar dira! Orduban ondo ikusten dira! Ordubantxe bai eskuz edo atxurrez atara biar dira ta garbitu biar da solua, landara onak emon dagijezan igali eder zorijontsubak! Augaitik itandu biar da zelan geitu zan mutillen gorrotua, ez zetatik erne zan.

Prakerretxo ta Motrollotxo txikitan edozer ezerezkerigaitik burrukan ibiltan ziranian, zenbat bidar jazo ete-zan egotia urrian gixon pilloren bat, eta onek, mutillak banandu ta bakian ipiñi biarran, amorratu ta sututen ebezan, eurai begira alditxo bat emotiarren, onetariko esakerakaz:

— Ia, Prakerre, gogor, arrayua, eztagijela esan makalak garanik! bere auzotegitarak.

— Ia, Motrollo, ez ukatu, euria dok ori ta!

Noz-edo-noz burrukea amaitzen eben, nekatzen ziralako ez euren amorruba gitxitzen zalako, berau erakusten ebela begirakun ta esakun gaiztoekaz, ta etxeratzen ziran soñekuak loitu ta urratuta, sudurretik odola dagijola, ta arpigitxoetan baltzunen bat edo beste ukabilkadakaz egiñak.

Etxera elduberan, an ixaten ziran garrazijak; bakotxaren amak, burura esku bijak jasota, samako zanak asarrez andituta, begijak txingarrak irudijela, urtetan zan semiagana didarka:

— Nok ipiru au era orretan? Nor ixan da neuk neure atzamarretan ito daidan? Beti ixan ixango da urlia txakurtua! Oraintxe, geroko itxi barik, juango naz taraska orreri esatera azikera obia emon dagijola bere txakurkumari. Bai ta laster gero!

Alkar aurkitxen ziran emakume bijak eta euren aboetatik, kerexak bata bestiaz katigatuta otaratik lez, urtetan ziran iñok asmau ezin leikezan itz zikin, irain eta txakurkerijak; sarri, ondoren, alkarri oratuta lotsagarritzko burrukea egiten eben, eta, dana mutikoen eurrian!

Au ezeze, gero, gurasoekandik artzen ebezan onu deungak, amorruez emonak:

— Ollanda demoniño ori! Iñoz agaz burrukan asten ba'az, ezakit ondora etorri buruba austen ezpa'dautsak, ezpabe neuk sayetsok berotuko dauskadaz, epel, irabijo bako, ezakit zelako ori.

Bertan-bera itzijaz bakarrik, solua jorratu ta zainduten ezpa'da, geituz da geituz ba'duaz bedar galgarrijak, eta azkenez, erindako azijetatik datozen landara onak itoten ba'dabez, zer ezeteda jazoko, bedar txarrak ainbat lasterren atara biarran, eurai lagunduten ba'yake?



Jakiña, ixan biar leuken, eta ixan be ixango zan solo edo baratz, igali ta lora ederrez betia, larra bat egingo da, sasija ta otea ta arantzea baño besterik eztaukona.

Zelango zenbatza emon biarko eben Erabagile Nagusija'ren aurrian Prakerre ta Motrollo'ren guraso ta errikidiak, aixia emon eutsoelako aren bijoztxubetan ixitu zan gar txikijari, putz bategaz itxali eitekenari?

## II

Arribil'go ardandegijan, igande goiz baten Meza nagusi ostian, gixon taldetxo bat eguan euren eztarri egarritubak ardao zuriz bustitzen. Geyenak lurginañak ziranez, autuban eragoyoen eguraldi ta baso ta solo ta abere ta onetariko gauzetaz. Guenian gaste batek aitatu eban arratzalde artan Arribil'dik ez urrin egin biar zan erromerija.

— Mutillak, errosarijo-ostian erromerijara jua biarko yuagu dantzaldi bat egiteko.

— Juan ez ostera? Ori zetan esan bez.

— Baña, itunduta zagoze neskatilekaz?

— Bai, Prakerre ain ospe zalia dan lez, or ibilli dok batzui ta beste itz egiten, gaur andijenetaikua egin biar dala ta.

— Errotabe'ko neskatileari be itz egin ixango yautsok orrek.

— Baña mutillak, egija ete-da Motrollo be neska orren atzian dabillala?

— Egija dok bai.

— Andija dok euren orraitio! Orain arte etxoek euki ba sekulan gauza baten naya, ta, orra! inoz alkartu dozak nai baten, inoz baño asariago geratzeko.

— Eta, zeñi arpegi emoten yautsok neskatileak?

— Ziur ezer etxakiagu, baña zurrumurruba dok ortik ziar, Motrollo'gana daukola zer geyago.

— Arrayetan, ederra be badok eta!

— Eztok aingerua, baña beste erkiñaren aldian gixon-itxurea yaukok beñipein.

— Bai, gixon-itxura ederra! Arimea aldendu ezkeru, naiz kanpotik naiz barrutik ori ta astozar andi bat aren baten.

— Ba, Prakerre'gaz eskondu edo tximiño bategaz eskondu, etxakiat neuk zer gura ixango neuken geyago.

— Arratzaldian an ixango dozak bijak.

Orduban, ardandegijan eguan zar batek esan eutsen mutillei: Jaungoikuarren, eurokaz arduraz ibilli zaitez, ezbiar bat jazo eztaiten danoen lotsagarriako.

— Goguan artuko dogu zeuk diñoskuzun ori, Juenanton; baña ezto uste burrukaldi ta zartada batzuk baño geyago jazo leitekenik.

— Etxakiat ba. Neskatilea Prakerre'gana ballegok, biarba Motrollo errazago baketuko litxakek, bestia baño gixonagua dalako; baña esan dozuben erara gauzak dagozan ezkeru, beste kontu bat da. Prakerrek, txikija ta ziztrina dalako burla egin dautsoela uste ixango yok eta zoratuko yakok, eta edozer ezbiar egiteko bidiak artu leikezak.

— Ixan leiteke, baña ixan ta be, zer? Aiztua ba'darua be, Motrollo ezta aren bildur, belarrondoko bategaz urriñera bidalduteko biar dan baño sasi bidar indar geyago dauko ta.

Arratzaldian, erromerija zan lekuko zalaitxua bete-beterik eguan albo-errietako gasterijaz; an ebiltzan auts-artian, arpegijak gorri-gorri ta ixerdija tantaka erioela, eguzkijak eta arduak eta eurak erabillen arluak berak emoten eutsien beruagaz, arnas-estuka nekiaren-nekez, baña ori gora-bera, danak barreka ta pozarren.

Prakerrek auresku bat egin eban, erabilli ebazala inun diran anka-biyorkadak eta kirimillak, guztiz bizkorra zan ta; lagun gustijak berari begira egozan, eta Arribil'tarrak sokan piskat arrotxo ebilzan alako dantzari urtena euren darra zalako. Errotabe'ko Marikrus ekarri eutsoen lagun, eta sokan sartu baño len, arek ixan ziran txotxolokerijak Prakerrek egin ebazan neskatileari eder egitarren! Jaurti eban bere txapel gorrija Marikrus'en onetara, ta asi zan artazika ta morapillaka bere anka bizkorak txilibituaren soñu arin bategaz lagunduta, atzera ta aurrera, ta gora-goraka, ta milla jira-biraz; artian, neskatilea irri barreka, pozarren, nasainasai ta arro eguan, zelan ez? etzan emakumia bestelan ixango! Prakerre'k au ikusijaz bere-artian inuan: «Ze Motroillo ta ze morrollo! aureko oni kendu dautsot bijotza; lora kutun au eztago astozar aren ezpanetarako.» Ta gero uste au bide zala pozen-pozaz erdi zoratuta txotxolotuta ibilli zan arratzalde gustijan Txandia beria ixan zan.

Motrollo barriz erreten egon zan, eta bein baño sarrijago ezaban asko biar ixan bestiagana jua eta bertan ostikoka eyotuteko.

Etxerantz abijau ziranian gure Arribil'tarro, Prakerrek lortu eban Marikrusegaz bakarrian itz egitia; bere bijotzeko ondoezak agertu eutsozan, agin-ataratzalle batek baño barriketa geyagogaz, otza-otzan, bildotza baño apalago; neskatileak, eskarrak egiñaz, itz-eta-itz adirazo eutson berandu eldu zala, edo besten bategana itzez lotuta aurkitxen zala, edo



onakoren bat; orduban bildotzari uliak zerbait aztindu yakozen eta otso-tuten asi zan; ekin eutson orraitño autubari, neskeari atara gurarik ia nor zan itxa artuta eguana, baña neskeak ezeutson esan gura. Onek, autubari ebagi bat emonaz, bere lagunakaz batzeko gurarija agertu ebanian, Prakerre osoro asarratu zan, eta esan eutson:

— Ori bai-dakit nik nor dan, eztozu esan gura baña.

— Bai-dakixu ba... zelan zabiz jakin gurarik?

— Ziur jakitiarren, zeure aotik entzutiarren; baña, itxuraz, orban edo zetakaren bat euki biar dau soso orrek, argitara atara gura eztozunian.

— Orbanik ba'dauko edo ezpa'dauko ezta iñoren ardurea, neuria baño.

— Jakingo dogu, geruago jakin biar dan gauzea da ta, Marikrus, ta nik susmetan dodana ba'da zure senargeya, neuk abinduten dautzut etzerala beragaz eskonduko, naiz-ta galerazoteko ludi' gustija erre ta kiskaldu biar ba'litz be.

— Jo... sul! ezta orrenbeste ixango orraitño; zu zaran gixonaz gusti ori egitia geyegi dozu.

Auxe, irri-barrez esanda neskeak igesi eutson bere lagunekana. Prakerre geratu zan odola irakiten ebala, abua ligortuta, bijotza zartadaka, arnasarik artu eziñik, ikaraka, bere abotik jaurti gura ebazan irain ta birauak ezin oguzi ta; sartu yakon bijotzaren erdijan asmo deunga zitala; noz-edo-noz asmo au bete al ixango ebanaren itxaropenak zerbait nasaitu eutson bere barruba, ta batzau zan beste gasteekaz. Amorruba sako-nago sartu yakon, errira eldu baño lenago Motrollotzar ikusijaz Marikrusen onduan, eta au ostera udabarriko goiz bat baño arpegi eder ta argijaguaz.

Arribil'era elduberan banatu ziran erromerijakuak aldratxoetan, eta bai-yuazan bakotxa bere auzotegi-aldera abeska ta santzoka; aldratxo onetan emakumiak ziran geyenak; gixonezkuak, ardandegijan sartu ziran geyenak azkenengo zurruta edateko.

Prakerre ta Motrollo be an ziran. Laster sortu zan matrakea bijen artian, eta Motrollok bestiari emon eutson bultzakadeaz txirikillia lez ziar bota eban jarleku ta mai artera; jagi zan au suge zitalaren amorruez, edegi eban aitzua, ta ezpanetatik bitsa darijola bai-yuan Motrollo'ri sartzen; onek aulki bategaz lo eban burutik-bera ta Prakerre ostera be lurrera; orduban sartu yakon Motrollo, aitzua kendu ta beragaz bertan triminduteko ustiaz, baña ezin ixan eutson kendu, katuba lez aginka ta ostikoka egiten ebala-ko. Gusti au igaro zan aida batian; banandu ebezan, Motrollo esku ta besoetatik odola darijola burrukan ebagi batzuk artu ebazalako, ta Praker-

rre buruban anditu ta zauri batzukaz, bestiagandik arturiko blaustadakaz. Onek, gorrotoz bixi-bixi begijak beteta ebazala, esan eutson Motrollo'ri arrapauko eban lekuban garbituko ebala.

Alkatiak au entzun ebanian (zer-edo-zer berotxua zan bera) esan eutson: — Zer garbitu edo zer arrayo? Nor garbitu biar dok ik, demoniño orrek? Etxera ixil-ixillik, eta laster juan be gero, aitzo ori emen itzita, katu txatxar ori!

Prakerrek, azkenengo itz ok entzun ebazanian, albuhan eukan edontzi bat artu, ta jaurti eutson burura alkatiari, ta odoldu eban; orduban, danen artian oratuta, amorratuta egualako, pizti basati bat ixan balitz lez lotuta espetxera eruan biar ixan eben.

### III

Erromeri eguneko jazoerak ondo ospatsubak ixan ziran erri txiki aretako biztanlientzat.

Jazoera arek bere ardurapian artu zituan Epaikarijak, eta epaitu eban burrukari bijak espetxian gerizpea artu egijela alditxo baten, eta gero Prakerre erbesteratu eitela Arribil'tik lau legua ingurutik at.

Epayá bete eben. Motrollo eskondu zan Marikrus'egaz, ta maizter edo errenteru jarri zan erriko basetxe baten; Prakerre juan zan biziten andik bost legua bidian eguan erritxo batera, ta an ipiñi ebazan bixargin-tzea ta zapatagintzea.

Arribil aonan bake-bakian geratu zan; bertako notin zentzudunak ezeben asko biar egun artako odol-ixurtzia ija bedeinkatzeko, bere ondo-ren, iñoren kalte andi barik, alako bake dontsuba ekarri ebalako; baita uste eben, Motrollok eta Prakerrek alkarrengana eukan gorrotua, urtiekaz bigundu ta azkenez urtu egingo zala. Edozelan be, ondo zan bata bestia-gandik urrin eukitia.

Orraitño, Prakerre beti Prakerre, ta Motrollo beti kirten andi bat ixango ziran, txikitatik ekarren laztasunagaitik; azikera txarra ixan daun zugatza, lenengo urtietan okertu zana, ta alan andi ta gogorra egin dana nok zuzendu? Jaungoikuak bakarrik bere almenaz, beste iñok ez.

Baña Jaun Irakasliak biarba orrelako abe okerrak zuzendu barik izten dauz askotan, gustijori ikusi eragiteko zelako ondorenak dakazan azikera gaiztuak, eta beraz ikusi daigun zelan eta zenbat umiak zaindu biar doguzan okertu eztaitez, eta iñoz okerbidian ikusi ezkeru zuzendu daiguzan artarako eskubiderik ba'daukogu, ta euki ezik, beñepein ez emon indarririk artu daben bide deungatik jarraitzeko.



Gixon egin zanian gugaitik, Berak irakatsi euskun Bere txikitxoan aurrian galbidia emongo eutson gauzarik egin baño obe dala samatik errotarri bat estu ta itxasora bota ixatia.

Guretzat Bere esana bakarrik naikua ixan biar leuke bide zuzenetik ez urteteko, baña zorigatxez ezta alan, eta Jaun errukitsubak jazoerakaz egu-nero Bere agintzak gomuta erazoten daukuz. Ludiko jazoera gustijetan, ondo begiratu ezker, ikusi daikeguz gure Jauna'ren irakaspen ederrak.

Prakerre'ri gorrotua etxakon gitxitu. Estura andijan bixi zan; berak eban erruba, eskondu barik eta ganora barik, ardanetxietan, erromerijetan, eta alakoxe lekubetan aldirik geyena emoten ebalako; baña berak, estutasun onen jatorrija ipinten eban Motrollo'gaz euki eban asarrian. Igaroten ebazan atsakabe gustijetan bijotza garrez beterik esaten eutson bere burubari:

— Axe ixan dok ire ondamedija, axek galdu au sekulako, ezintzan aurkituko orain agoan eran Arribil'en bixi ixan baintz. Augaitik lenagoko gorrotua bixi-bixi eguan bere bijotzian, eta ez bixi erkiñaz, ta bai sendo, gogor ta iñoz baño andijago.

Motrollok, bere emaztiaren nebakaz asarren batzuk ebazan, ogasun izkijen batzuk zirala ta etzirala, ta ain latza ta kirtena zan lez iñok ezin eban beretik atara ezetara be. Euren artian asko garrastu ziran, eta bein-edo-bein urten zan urten biar zana alako kirtenaz eztabaidetan ibilli ezke-ro; berak eta bere koñatu batek alkarri eskubak ezarri eutsoezan, eta Motrollo'k ebazan indartzarrakaz apurtu eban bestia ukabilka ta ostikoka, ta geyagora elduko zan banandu ezpa'lebez arin. Koñatuak, lagun-aurrian, ori lako jazokunetan asarriaren beruak erazoten dauzan itzekaz Motrollo zematu eban:

— Au ordainduko daustak ba, astozar, kirten, arrayo orrek; indarra daukuala ta errazoyari begiratu barik beti euriaz urtengo dokala uste dok ala? Sutausak ik baño indar geyago yaukok, ire atzamarrak baño zorrotzago dozak aiztuak eta azkorak.

Urrengo eguna igandia zan; edurra eguan goyetan, eta euria zan beyetan; Motrollo'k erriko ardanetxian apaldu eban eta bertan egon zan gaba ondo sartu arte, iganderik geyenetan berak eta beste askok ekanduba eben lez. Urten zan bakarrik etxerantz, eta atzian gixon bat yuakon, jausten zan euriaren ardura gitxigaz; aixiak eta eurijak batera egiten eben otsaz Motrollo'k ezebazan entzuten bere jarrai yoianaren oinkadak; au noixik-bein urreratzen yakon, eta berialaxe gelditzen zan bide-ertzian, egin gura ebana egiten azartuko ezpa'litz lez. Gero, itxuraz, beste asmoren bat artu biar ixan eban, bidetik aldendu ta geyago agiri etzalako.

Iñor bixi etzan etxe txiki erdi-apurtu baten ondolik igaro biar eban Motrollo'k. Orma-ondolik yoiala, sayetetik zartada bat susmau eban, bigurtu zan, baña indarrak uts eginda aieneka lurra jo eban. Etxiaren illunbian eskutaurik eguan gaizkiñak aizto zorrotza sartu eutson; Motrollo lurrian ikusi ebanian, urten eta esan eutson:

— Bixirik ago ondiño, tximista ori? Ezagutzen al nok? Nor nazan bai al dakik? Prakerre nok! Prakerre makillatua, Prakerre ostikopetua, Prakerre erbestetua, Prakerre bai, estu-estu ta larri-larri, ija eskian ibilteko eraz aurkitzen dana eugaitik! Ai, noz-edo-noz jausi biar uan neure esku-betan arrayo orrek!

Motrollo gixajua azkenetan eguan, ixerdi larritan, zotinka, ta bildur-turik erijotza ikaragarrija ain urrian ikusita; gomutau zan Jaungoikuaz, ta emazte ta semetxoekaz; bere goralbenez esan biar dogu, sendijaganako maitasunak bere gorrotua betu ebala, ta beraz Prakerre'ri esan eutson:

— Jaungoikuarren itzi naik! Egin daustakan zaurija garbitu ta estaldu egistak, enaik il!

— Ezta! Ementxe il biar dok, ementxe gusti-gustijak ordaindu biar dostazak.

— Tellatutik bera datozen itoxurak ixan daitezela ik nigaz egiten dokan gaitakeriyaren ziñaldari, esan eban Motrollo errukarrijak, ija zer esaten eban be ezekijala.

— Ixan daitezela ba!! didar eginda Prakerre otso gogorrek bertan erail eban.

Baña, zelan ixan eraillia Prakerre, andik urrun bixi ta? Oraintxe azalduko da.

Motrollo'k larunbatean bere koñatuakaz ixan eban burruka ta onek zelan zematu eban, igande goixian eldu zan Prakerre'ren belarrietara, ta Motrollo'k ardanetxian gabaren zati bat igaroten ebala igandetan bai-ekijan lez, erabagi eban egitia egin ebana.

Bera bixi zan erriko ardanetxian aurkitzen zan igande-illuntzijan mus-jokuan; eta buruko min aundija eukala ta txarto eguala-ta, jokuari itzi eutson, eta bertan egozan batzuk lagun egin eutsoen etxeraño, an larran-billo-ura artu, ta euren aurrian ogeratu zan; gerotxuago, zerbait obeto eguala ta, bidaldu ebazan esanaz bijaramon goixian, bada-ezpadan eldu eitezela, baldin txartuago ba'eguan, bakarrik eta gexorik bere buruba ikusi ezegijan.

Lagunak alde egin eta gerotxubago jagi zan, urten etxetik, eta basorik baso bidia asko laburtuaz, arin, diabruak bere eguak emon ixan ba'leutsoz lez, artu eban Arribil-aldera, ta eldu zan ondiño Motrollo ardane-



txian eguala, ta gau utsez, bakartadian, atzetik eta gogorkeri andijaz esan da zelan egin eban erijotza madarikatuba.

Berialaxe bigurto zan etxera; gau luzia zan lez, eguna zabaladu baño lenago eldu ta ogeratu zan, lagunai itxaroten. Onek, etorri ziranian, aurregunian baño askozaz gexuago aurkitu eban; egun batzuetan ai-ene guzurrezkuak ugari ebazala, lotu zan oyan.

#### IV

Urrengo goixian jakin eta zabaldu zanian Motrollo erailda topau ebela, erri gustija zurtuta gelditu zan; errijan a lako egitada deungarik ezeban iñok gomutaten, ezta zarren artian be.

Epaikarija etorri zan, agindu eban aratuteko eraildakuaeren soiñeko sakelak ta lapurretan egitiarren erail ete eban; ez, aldi eukazan diru ta balijodun enparau gauzak. Itandu eban iñogaz asarrerik ixan eban; bayetz ba, koñatu bategaz zala asarre ta iru egun aurrerago alkar jotet ibilli ziral. Beraz, artu eban koñatua, ta epaiterki buruko espetxera eruan eban. Epaikarijak egiten eutsozan itaunetara, garratz ukatzen eban; agindu eutson azaltzeko nun egon zan gau artan, eta berak erantzuten eban etxian egon zala ta etxeoai itanduteko; baña etxeoan esanak ezeutson balijo, ta oster, burrukea ikusi eban gustijak esaten eban zelako itz gogorraz zematuta eban Motrollo.

Epaikarijak, orraitino, itandu eutson Prakerre bixi zan erriko alkatia-ri ia alde egin ete eban ak iñora erailtza egin zan egunetan; ezetz erantzun yakon, igandian oian sartu ta egubenera arte gexorik egon zala.

Beraz, epaikarijak eta danak, eskijertzat edo ziurtzat euker Motrollo'ren erallia bere koñatua ixan zala, onen ukamenai jaramon barik. Epaya bere kaltez ixan zan, urte askotan espetxian egoteko nekia ezarri eutsoen errubako gixajo andia!

Prakerre'ri, bijotz gogorduna ixan arren, sortu ta jayo yakozan bijotzaren erdi-erdijan artxo bi, txiki jayo arren andi egingo ziranak, nun jan bai-euken da; bata, egin eban erijotzagaitik; bestia, espetxian eguan errubako gixajuagaitik.

Aldija aurrera johan, eta azi ta azi, urte batzuetan eldu ziran eurai egokioen anditasunera, ta Prakerre'ren izakeran aldakuntza andija egin zan apurka-apurka. Etzan ikusten erromerijetan eta beste jolas-lekubetan; itxala egin zan; len barriketa utsa zana, ixilla ta itz biarrekuak baño esaten ezebazana bigurto zan; itzi eutson jokuari, dantzeari, barre-egitia sekula-

ko jua zan bere espanetatik: beste gixon bat zan. Bere auzo, aizkide ta lagunak barriona emoten eutsen esanaz:

— Bein edo bein gixon gustijak buruba jarten dabe; zuri be eldu yatzu aldija; ekin ba lanari, emaztegeya billatu, ta onerako izan daitela.

Ezeben barrutik ikusten! Egunez, al ebazan egiten ebazan lagunen aurrian zelan edo alan estalduteko bere barruko larritasun eta atsakabia, bildurrez susmau ezegijen zetatik etorran. Gabez bildur utsa zan gixajua; eukiten ebazan ames ikaragarriekaitik, lo egiten bildur; itxarrik illunian, bildur; argijagaz, berak orman egiten eban gerixiaz, eta argijak egiten ebazan zirkiñakaz basterretako illun-unak be zirkin egiten ebanian, nor-edo-nor gelan egualakuan, bildur; gabeko ixildasunian zaratatxo batek ule gustijak zutunduten eutsozarian, bildur; etxetik kanpora urteteko, bildur; etxian egonaz, bildur. Egunez nai gabez, lagun-aurrian naiz bakarrik, beti-beti bildur.

Otu yakon bein, esaten be gaitz dan bide bat, atsakabe ain izugarrijei iges-egiteko; baña beste aldetik susmau eban Jauna'ren arpegi asarre ikaragarrija, ta bildur andijagua sartu yakon bere aragi ta azurren barrubarrurano.

Alan, jausi biar, ta azkenez jausi zan gexorik. Abadiak eta Alkatia emakume bat bidaldu eban, gabeko ordu batac baño bakarrago eguan errukarrija zaindu egijan. Osalarijak aginduriko osakayak baño laguna eukitiak on geyago egin eutson, eta egun batzuk igarota jagi zan ogetik, ondiño makal eta zurbil eguan baña.

Anon, gexo-ostian eguala, eurite andi bat etorri zan; arratzalde batian, euri zaparrada luze bat zala, bai-eguan Prakerre leyuan, begira zelan ura jausten zan odeyetatik lurrera, gela-barruban emakuma laguntzallia kaltzetagiñan jezarrita eguan artian; bai-eguan Prakerre begijak zabal-zabalik, geldi-geldi, gauza gustijekaz aztuta, burutik oldozpen gustijak iges egin ba'leutsoe lez, itxaso ta erreka ta eurijaren aurrian askon jazoten yaken antzera. Itozurak itxartu eban eta ekarri eutsoen gogora bere betiko gomutia, ta esan eban:

— Etxuazan ba itoxurak ipiñi ziñaldaritzat Motrollo'k gau artan ilnebanian?

Emakumiak itz ok entzun ebazan, zurtu zan, eta jarraitu eban bere lanian zirkiñik egin бага; Prakerre be etzan igitu bere lekutik zati baten; etxakon burutik igaro, bere oldozkuna iñok entzuteko eraz urten yakonik.

Geruago laguntzallia urten zanian andik, alkatia kalian aurkitu eban, eta azaldu eutson entzun ebana; alkatia «ezin ixan leike» iñuan, baña,





bada-etzpadan epaikarijari izparra bidaldu eutson; etorri zan au, artu eban bakarrian Prakerre ta eraso eutsan gusti-gustija.

Zabaldu zan izparra ingurubetako erri gustijetan; askok eta askok ezeben ziñestu gura, Prakerrek gabez Arribil'era egin eban juakundia zer-tzelada gustijekaz jakin arte; gero itanduten eben zelan jakin zan ain esku-tu eguan gauzea, ta itoxurak ziñaldaritzat ildakuaren aldetik ipiñijak ager-tu ebela gustija azalduten yakenian, arrituten ziran eta Jaungoikua goral-tzen eben, bere bildur osasuntsua bijotzetan ebela.

Ainbat lasterren aginduba bidaldu eben espexera, bertan eguan gixajo errubakua azkatu egijela. Laster juan zan Prakerre aren lekuba betetera; ara juan ziran beragaz atsakabe gustijak; an urte askotan soñian burdiñazko lokarriak eta barruban gomuta larrigarriak narraz eruan eba-zan; an urte askotan erdi gexorik erdi osaturik bertako bixikera gogorak, eta geyago, askoz geyago, bere bijotzian josita eukoazan untziak ezeutsoen itzi une bateko alaitasunik; an urte askotan eruan eban bixitza bat, irudi-men azkarrenak asmau leikiana baño itxalagua ta bildurgarriagua, Jauna'-ren itxarokuna gixajuak galdu ebalako; ezeguan aren bijotzian samurtasun-ik, ezeguan aren begijetan negarpulurik. Axe zan nekia! Nok azaldu daike zelakua dan negar bagako atsakaba?

Eldu yakon bein-edo-bein ludi au izteko orduba, berak gura baño lenago, ainbeste larritasunen erdijan bixi arren. Zorijonez euki eban onduan abade jaun on bat, aren bijotzera Jauna'ren itxarokuna ekarteko benetan nekatu biar ixan ebazana buruba, bijotza, ta miña; azaldu eutson Jauna'ren erruki neurri bagea, ta oben edo pekatu andi ta ikaragarrijen azpijan aurkitu arren, bere itxarokuna galdutia, bere ontasuna ez ezautzia dala obenik galgarriena; itz egin eutson bijotzetik damutasunatzaz, geure Josu-Kisto Jauna'ren erijotzeatzaz, ta abar; ekin eta ekin lortu eban argi izpitxo bat sartzia illundasan ain sendo artan; apur-apurka negar eragin eutson, eta atondu eban Eleixa Ama'ren azkenengo Ikurtonak edo Sakra-mentubak artzeko; artu ebazan eta il zan.

Gaurko egunetan askoren artian dabilzan ustiakaz batebateg azal-duko leuke Prakerre'k eta Motrollo'k ixan eben gorrotua, onetara: «Ori euren tayu ta ixakera ain ezbaridiñetatik nai-ta-ez datorren gauzea da.»

Orreri erantzun leikio katuba ta txakurra be, txikitatik irakatsi ezke-ro elkarren aizkide ixaten dirala; irakatsi ezkerro ba, errazago lortuko da ori gixonen artian, adimendunak diralako, anayak eta beraz alkar maita-tzeko egiñak diralako.

## Garagarrillean edurra

Otalar'eko Txomin baño gixon ixillagorik eta bakarzaliagorik ezta iñun ixan.

Lagun-artian iñoz egon biar ixaten ebanian, ixi-ixillik egoten zan, entzun eta entzuten bestiak esaten ebena; bere gogua zetara eguan iñok ezin igarri eikion, ikara txikarrenik be eragiten ezeutso-lako bere arpegiko narrubari; noizik-bein begijak erabilli ezpa'leuz alde batera ta bestera, edonok artu eikion arrizko edo zulezko edo argixarizko gixon-tayutzat.

Gitxitan, oso gitxitan asten zan bera itz-egiten; geyen-geyenetan berari egin biar ixaten yakon, eta orduban be, iru edo lau itz laburregaz amaitzen eban bere erantzuberea; gura ta be, alegiñak eginda be, ezin eban iñok euki aregaz izketa luzerik, gixon legorragorik!

Ezek ezaban ikaratzen. Urira iñoz jatzi zanian bere menditik, men-ditar batentzat beti ikusgarri ixan oi diran gauzaen ondotik igaroten zan ezeri begiraka ibilli barik, gauza areik egunian-egunian ikusten oituta egon ba'litz lez. Lenengoz *automobil* bat igaro yakonian ondo-ondotik adarros-ka, autsa ta atsa darijola, txakur bat igaro ba'litz baño jaramon geyago ezeutson egin. Kirijo edo *nerbio* bagako gixona irudijan.

Bere ixakereari alagala etorkijon bixibidia eban Txomiñek. Ardizain ebillan mendijan, artaldia ugazabak eta berak erdirantzta edo erdibana eukela.

Alperrik ixaten zan ari esatia: «Txomin, zuk au edo or edo bestia egin biar zeunke, auxe datorkixu ondo, orixe egin go ba'zendu...» A etzan iñoz ibiltzen iñoren esanetik, bere gogotik baño; gixon azkiagorik ezeguan inguru artan.

Onako baten agertu zan errijan Matxin Kaixku barritxuba, Ameri-ketan urte bi edo iru ibilli ta gero, ta erriko ardanetxian igande arrastei baten gixon pillo andi bati eragoyon edesten edo kontetan, guzur ta abar, itxasuaz-andiko gauzak. Txomin Otalar be entzulien artian zan.

Ameriketako lurraren goralben andijak esan ebazan Matxin Kaix-kuk; eta batez-be, abeltzañak edo unayak ederto irabaz ten dabela, gitxik juan gura ixaten dabelako basamortura ta geyenak urijetan gelditxen dira-lako; eta augaitik Euzkadi'ko baserritarrak, bakarrian bixi ixateko igoñik eztaukelako ango basamortu zabaletan, laster aberaztuten dirala; eta abe-riak azteko zabal ixugarriak dagozala; bai-dirala an Euzkadi gustija bes-teko zabalak bedar gozatsuz estaldubak, gixon bakar ba bixi etzala.



Onek gustijok entzun ebazanian Txomin Otalar'ek esar eutson bere burubari:

— Orrexek dozak, Txomin eurezako aginduta lako lekubak; orixe dok, abeltzaintza ori, bixibide ta irabazpide egin-egiñekua iretzat. Ua Ameriketara.

Bijamon-bijamonian bere ugazabari Txomin agertu yakon eta esan eutson:

— Ugazaba, zeugaz berba batzuk egiten nator.

— Mu... til!; berba egiten etortzeko zegozer jazo dok... Gure ardiak otsuak jan al yozak?

— Ez, osorik dagoz. Neuriak erosiko zeunskidaz?

— Baña, zer dala ta?

— Neu banua.

— Nora gero?

— Ameriketara.

— Zoratu egin al yak? Zer darabik euk? Bai-dakik zer dan Ameriketara juatia? Ezegik uste or Anboto-ostian dagola.

— Neu banua bai... ta billatu egixu nire ordiazko bat ardiak zain-tzeko, ta esaistazu neuriak erosiko daustazuzan ala ez.

— Buru orretan sartu ba-yak ara juatia, alperrik ibilliko nok iri ezer esaten... ludiko gixon jakintsu gustijak bai-letozak ire burutik asmo ori ataraten elleukiek ezer egingo... tirok ba, erosiko dauskadaz ardiak, eta ua euk gura dokan lekura.

Saldu-erostia egin eben, eta Bagilla'ko 12'g egunian Bilbao'n ontzira-tu zan gure Txomin.

Dagonilla'ko azken-egunetan agertu zan barriro Txomin bere erri-jan, eta beti lez, ixil-ixillik, atzera zegaitik etorri zan iñori esan barik, goiz baten ugazabana jua zan.

— Bagillean saldu neutsuzan ardiak atzera erosiko dautzudaz; gura ba'dozu.

— Bai pozik be. Eure ordeztu dodan ardizain barriak gauza onik etxeustak egiten... ainbat ardi galdu yozak... bidaldu biar yuat, eta eu ipiñi-ko aut len lez. Baña esaistak, Ameriketara eldu az eu?

— Bai.

— Eztok egin an egote andirik ba.

— Egun bat. Buenos Aires'en. Ontzitik urten, eta bijamonian eto-rran beste bat onantza, ta antxe sartu nintzan.

— Zegaitik ori?

— Garagarrilla-ko 10'garrena zan.

— Da?

— Edurra zan gogoz, urtarrillean lez, otzak baster gustijak ondatu biar.

— Eta bildurtu egin intzan, eztok?

— Bai ba, Garagarrillean eguraldi-modu ori zanian, neguan nor atondu an?

— Ondo egin dok. Emen obeto bixiko az.

Andik egun batzuketara errijan zabaldu zanian zegaitik ain laster etorri zan Txomin-Otalar Ameriketatik, Matxin Kaixku'k barre santsoka iñuan:

— Kirten andija, emen udea danian an neguba ixaten dok, eta emen neguba danian an udea. Ori dok osteria idija!

— Ezpa'yekijan, zer egingo yuan ba?

— Arrañak baxen mutuba ezpa'litxok esango gayeutsokan, baña, orixe yagok ba, etxok iñogaz itz egiten, eta bere burutatik ibilten dok eta... pekotza!

Txomin'i esan eutsoenian Keixku'k iñuana, erantzun eban:

— Zortzi urteko umetzat artzen nozube ala? Alde batian neguba ta bestian udea? Nok entzun yok iñoz ori lako astakeririk? Niri etzakidaze etorri orretariko barriketakaz, zeuben amamai jua zakioyeze eurokaz, txatxu andijok alakuok!

Bere ugazabak be ezeban atara gura okerretik, barriro alde egingo ete-eutson bildurrez, ta sakatu eutson geyago bere ustia; eta atan gelditu zan Txomin: Buenos Aires'ko alde ori otzaz baster geiztua dala, Garagarrillan edurrez zuritzen dana, ta beraz, ia zer ixango dan neguban.





## Aratoste

Mutiko soster pillotxo bat agiri da, obeto esateko, eskutaten da berezi-barruko ikeztoi zuluau.

— Mutillak, gaur aratoste dok, eta koko jantzita juan biar yuagu errira.

— Ederto asmau dok.

— Ori, ori!

— Aupa mutillak!

Au da poza koko janzteko. Zuzendu dabez nundik edo andik zapi zar batzuk eta papel zati andi batzuk; norbaitek, etxera-ostera bat eginda, ekarri dau aril bat amari ostuta edo.

Zapi zar ta papelok banandu dabez, amaika agiraka ta asarre alkarri eginda gero; begijetarako zulo txo biña egiten dautsez, ta kokote-aldian ari puskategaz lotuta, egin eta jantzi dabez karatula dotoriak.

Gero, arkondarea praken ganetik imiñi, txapela ta jakia itzulijetara jantzi, praka barrenak toloztu ta jaso ija belaunetaraño... ta orra kokomarro jantzita nire erriko mutiko koskorrok.

Eurok baño obeto marrotuko dira urijetakuak; baño iñor ezta ixango pozago, jantzi polit-ederrak erabilli-arren.

Arek egiten dabez barre algarak alkarri begiratuta!

— Mutillak, ikusiozube oni arkondarea. Laster ezautuko abe i, txarrito ori.

— Euk al daukok garbiyagua, zotza lakoxe txanka me orrekaz?

— Oni barriz karateluak ezin yautsok artu arpegijaren erdija be, ain yaukok aldaba andija!

— Aituok, i barritxu? Eñeukek trukauko ba ik daukuan gaztaña txikol orregaitik.

— Barriketak itxita tirozube, gayuazan errira.

— Gaur atso gustijak ikaratu biar yuaguz.

Piperpote utsitu batzubetan arri koskorrak sartu ta zarata eragiñaz abijau dira noz-edo-noz oyuka ta santsoka.

Euren bidia lenengo aurkitxen daben etxe-ondoko errekatxubaren ertzian eskaratz-tresna batzuk dagoz legortzen, garbituta gero; artzen dabez andik sarten bi ta mazkillu bat, onek be zarata egiteko, ta abarrots andijagaz sarten dira errijan.

Iñun katurik ikusten ba'dabe arrika egiten dautsoe, katu-karraxi andijak eurok egiten dabezala. Txakur gustijak arrapaladan duaz igesi etxe-ostietara edo etxe-barrubetara, al daben lekura, andik asten dirala ausika ixildu barik bildurrez. Batu jakez etxe-artian olgetan ibilli diran erriko ume txiki gustijak, eta danak batera jarraitzen dabe.

Arrapau dabe, geruago, errota-osteko gaztañadijan belarri andidun asto zar-zar bat; igon yako bat bizkarrera, ta bai-dabilz poz-pozik alde batera ta bestera, itxita aurkitxen dabe zan ate gustijetan arrika ta makillaka zarata andijak atararik. Atso gustijak barre santso baten dagoz eurai begira, bixi-bixi ta pozik daukezela euren begi tximurrak, eta agiri lokaren bat edo beste agiri yakezela euren abo bartubetan.

Baña ludi onetan poz iraunkorrik eztago, eta an dabillan pozak be egundoko ariñen alde egiten dau.

Iñok igarri barik bertaratu dira, alde batetik errotarija bere astuaren billa, beste aldetik sartanak eta mazkillua artu dabezan etxeko gixona bere tresnaen eske.

Kokoteko bi galantak artzen dauz asto-ganian arro-arro dabillan *zaldunak*; eta tresnakaz dabilzanak, baita beste enparauak be, artzen dabez ostikada ta zapladako desentiak... eta ortxe amaitu da gure erriko aratos-tietako poz gustija.

Uxatu ta sakabanatu dira mutiko koskortxuok erri basterretara, imiñi dabez jantzijak egunoro lez, ta kitu.

Itandu egiyozube mutiko onei aratostietan olgau diran ala ez, ta erantzungo dautzube albuak minduta daukezala ondiño barriaren barriaz.

Ez Bilbao'n, ez Paris'en, ez Niza'n, ez iñun ezтира olgau mutiko koskor orrek baño geyago.

Gixon egin daitezian be gomutauko dabez eurok aratoste egunetako jazokunak. Errotarijaren kokotekuak eta beste gixonaren ostikadak eta zapladakuak euren bixitza gustijan pozarren gogoratu yakez.

Poztasuna eztago onetara edo orretara jantzitian, asko edo gitxi eukitian; poztasuna norbere barruban dago, norbere goguan.



## Urte barri barri

Ene irakurliak, azaldu gura dautzuket nire baserriko ekandutxu bat, ara:

Or duaz estartea gora mutil koskor batzuk, txor-txor-txor, gustijak batera barriketan, une bakartxu baten be ixiltzen eztirala, musturrak gorri-gorri otzaren otzaz, oñetakuak eta praka-barrenak loi-loi eginda lupetzez.

Eltzen dira basetxe baten aurrera ta:

— Emen kantauko eta yuagu, mutillak?

— Bai bein! igaz be emon yeuskubean da...

— Tirozube ba.

Erreskadan jarten dira, ta ben-ben, gauza andiren bat egiten ba'-liñardube lez asten dira:

Urtebarri barri  
daukonak eztaukonari  
nik eztaukot eta niri  
emoten eztaustana...  
*txarri-belarri!*

Orain arteko abesti au euzkeraz dago, ta zer-edo-zer esan gura dau, baña emendik aurrerakuak erdi euzkeraz erdi erderaz esaten dabez, ta zentzumenaren apurrik eztauke, tentelkeri utsa.

Don Nikolas caramelo  
konpesore Mariandres,  
alarguna dontzeilla  
cantaremos alegria.  
Lau ventana bost ate  
sei etxe ta subete  
si si si  
no no no  
otzara bete solomo.  
Aingeruak gara  
zerutik gatoz  
una limosñita

porramor de Dios,  
aquí estamos cuatro  
cantaremos dos  
agillando agillando!!  
Matxin-arrando!!

Abesti onek asmau ebazana zororen bat ixan biar; baña ezebazan iñok asmauko, abesti askoren zatijak edo-dira, mutikuak erabilli-ta-erabilli, alkarregaz nastu ta itxulastu dabezanak.

Ondo ixango litxake barriak egin polito ta egoki, ta mutil txikijeji irakatsi, ta saritxuak emon ugari eurak abestuten yatorkuzanian, poztu dai-tezan, eta ekandu zar ori bere loyotarik garbituta ipiñi.

Nire erriko mutikuak eztabe ondo abestuten, baña sari andirik be eztabe artzen; gaztaña txikolen batzuk, sagar txatxarren bat, intxaurren batzuk, tremes-ogi zatiren bat... dirurik ez, orixe bai ez! an diruba baño lenago belarri bat emongo leukie. Esaten dabe, iñoz, ta eztaikit zein etxetako etxandereak bein lukainka-mutur bat emon ebal. Orain jakixu noz ixan zan jazopen arrigarri ori; ba, ni mutiko sostorra nintzala *Urtebarri* abesten ibilli oi nintzarian, eta, amaika zaparrada jausi da ordutik ona! gu baño andijaguak ziranak esaten eben eurak be entzun ebela lukainka-mutur orren ipuin ori.

Oraintsu, lengo urte baten jazo zan gauza arrigarrija, iñoz amesetan be uste ixan ezebena nire erriko mutikuak: *karameluak* emon eutsiezan basetxe baten.

Bai, eldu zan mutiko-aldratxua *Zinko* deitzen yakon baserriar baten etxera, ta oi dan lez, abesten ekin eutsen gogorik onenagaz *Urtebarri barri*.

Euren abeskundia amaitu ebenian, agertu zan *Zinko* etxeko atian, barreka-barreka, ta esan eban:

— Mutillak ba... ezkozubez arrapau gauza andirik emoteko moduan; orratiño, gura ba'zendubez, atzo Durango'tik ekarrita ortxe daukoguzan karamelo batzuk emongo geunskixubez.

— Bai bai, artukuz bai pozik be.

Karameloen billa *Zinko* barruratu zan bitartian, mutikuak ikotika pozaren pozaz, noz artu eben ba iñoz alako saririk gixajuak? Karameluak!!

Urten zan *Zinko* esku bijak bete karameloz, ingi zuri-zurijetan ederto bilduta bakotxa, ta iruna emon eutsiezan mutikoci, barreka-barreka esanik:

— Gauza merkiak eztozak onek eta bakotxari iru emonda be, pozik ixango zarie.



Ixango etziran ba! Ondo pozik artu eutsoezan! Estartea bera bitxalalerantz joyatala esaten eben:

- Orixe *Zinko* lako gixonak garaunik be etxagok errijan.
- Olakoxe gixonak gure ñeukezak.
- Sekuleko *Zinko* dok ori gero.
- *Dies* ixatia be merezidu yok.

Onetan euretaiko batek zabaldu eban karamelo-ingija ta... zer zan a!... barruban marraskillo-masala eguan; bestiak au ikusirik, zabaldu ebezan ingijak, eta gustijetan eguan marraskillo-masala.

Asi ziran barre-purruztadaka alkarri begira, ta erabagi eben errijan ezaguala *Zinko* baño gixon burletijagorik. Bitartian an agiri zan bera, muna-goyenan, mutikoeri begira barreka.

Gabonzar gabean jandako marraskilloen masak ingi-txatal zurijetan bilduten egon ei zan luzaro, mutikoei trankart egitiarren.

## Kukuba entzuten

Igande goixian lenengo Mezea entzunda, Bilbao'ko Goenkale'ko Txomin Porru etxeratu zanian, bere emaztiak esan eutsen:

- Zein gosari imiñiko dautzut, berakatz-zukuba ala sardiña zar errea?
- Ez, gaur basora nua, ta imiñi eistazu gaztaya edo, ogi zati bategaz.
- Bai, ta lukainka muturtxu bat be imiñiko dautzut. Egund ederra daukozu basorako. Perretxiko billa zuaz ala?

— Ez ba. Orrillean sartuta gagoz ta ondiño aurtengo kukuba entzun barik nago, ta gaur juatia otu yat, eta entzun arte enator etxera. Bakixu, lenengoz txori udabarritar ori entzuten danian sakela bero ba'dago, urte gustirako bero egon oi dala.

— Bai, gure ixeko, Jainkuak zeruan euki dayala, Mari-Baltz'ek be, orixe esan eroyan, eta beste askok be bai, ta ainbestek diñoenian... keia dan lekuban suba da.

— Ekazu ba atzo arturiko asteko alogerak eta...

— Bai bai, ene gixontxua... eutsiz; apaiteko libelaurena gibel ekarte-ko diruba ixan ezik, etxeko gustijok or daruazuz.

— Banua ba, ia zorijon bat ixaten dogun.

— Bai dago biarra. Zuaz ondo. Ia kukutxu ori entzuten dozun.

Eguberdi-aurretixuan orra nun sartzen dan Txomin Porru bere etxian arpegi illunaz.

— Da? Entzun dozu kukuba?

— Entzun dot.

— Tira ba! Beintzat geuretu dogu aurtengo lapikokua ta...

— Aste onetako gosia be bai, geuretu dogu...

— Zer diñozu? Eztot ulertzen.

— Ara emaztetxu: Or Iturrigorri-aldetik Buya'rantz juan naz, astiro-astiro, ta beti, al ixan dodala, zugatz-arterik zugatz-arte, txori zorijoneko ori noz entzungo ete-dodan ba, ibilli nabillala jan dodazala ogi ta lukainka-mutur ta gaztae-zatija; Deun Erroka-azpiko iturritxuan il dot egarrija, ur garden eder otz aretatik dangada batzuk egiñaz, ta... bapez! ludijan kukurik ezpa'lego lez.

Neure artian: «Andija dok!» esanda, jezarri naz Buya-barreneko zugatzijan sasi-moltso andi baten onduan, eta asmau egin dot antxe arratzaldera arte be geldi egoteko, leku oberik a baño amestu be ezin leike ba kukubentzako ta.



Zigarrotxu bat xituta bai-nago zabal-zabal arkoloka bedar-ganian, gerizpe gozatsu artan, ipar-aizetxu bigun ozkirrija arnasatuten ixan dodala... a zan arua! ta onetan sumetan dot sasi-ostian abarrotsa, begirutzen dot eta...

— Kukuba ixango zan!

— Bai, zereko kukuba!... gixon itxal bat, eskuban aizto (cuchillo) luze zorrotz ikaragarri bat eballa.

— Ene Josu!

— Eta erderaz esan daust emoteko berari aldiñan neukoizan diru gustijak eta agudo ta txitik be atara barik, bestelan gibetak euzkitara atarako eustazala. Bildurren-bildurrez agiñak alkar jotzen ixan daustela, ixil-ixillik emon dautsodaz dirubak. Zer egingo zeuntson?

— Ai bai, ondo egin dozu Txomin, zeuri ezer egin eztautzunian Jainkua'ri eskarrak.

— Gixon ori arin jua da gorantz, eta ni gelditu naz *pralle*, aldiñan lauziko barik, eta... diabrukerija ezpa'da!... ordubantxe, etxerantza abijau nazanian asi dira kukubak alde gustijetatik, alkarren leyan letxerik, kuku! ta kuku! Esan eikian neuri burla egiten ebiltzala!... Zer egingo yako!... Txarragorik be ikusi leike ta!...

— Ez estutu, ene gixon, atonduko gara zelan-alan, Jaungoikua lagun. Alde batera, jazo yakun ori ondo irabazita euki dogula esan leike.

— Zegaitik ba?

— Orrelako ziñeskeririk euki biar eztauko. Urte gustirako jana edo ondo-ixatia Jaunak emongo dausku, geure aldetik lan egiñaz alegintzen ba'gara.

Eta Txomin Porru zintzuak eta bere emazte on-onak, bakerik osoez naz bazkaldu eben euren lapikokotxua.

## Ziñaldari arteza

Udagoyeneko arratzalde epel-epela da.

Baseri-etxe bateko atarte-aurrian auzoko emakumiak batuta dagoz, bata galtzetagiñan, bestia baba-urkultzen, au bere gixonaren prakai ipingi bat ezarten, ori galtza zarren batzuk *errepasetan*, beste bat etxe-ondoko *pozulxuan* tresnak garbitzen...

Danak darabille esku-artian zeregiña, iñor eztago alper, baña iñor be ez ixillik.

Ego-axia dabil, eta oi dan lez, gustiz urduri dagoz emakumetuok, iñoz baño barrixubago, beti barrixubak ixan-arren. Etxakigu zetatik ez zelan (jakixu!) euren artian asarria sortu da, ta alkarri destañaka asi dira, gustijen aurrera iñun diranak ataraten dabezala.

— A bestelako zera! Ik eure modukuak gariala danok pentsauko don.

— Enagin asko zirikatu, asten ba'non asi ba, atarako daunadaz eskutuban daukonazan trapuzar gustijak eta.

— Ni... ri? Geldi-geldi gero! Lotsiaren izpirik ba'eukona, ondo ixillik egon biar euen.

— Ik eztakin lotsia zer dan be ta, neu ixillik? ez orixe!

— Ezaz ixilduko, ez; i beti ixango az betikua; ire onduan ezin bixi leiteken iñor be ta, geizto ori.

— Ni geiztua? ia beste bein esain!...

— Geiztua, bai; bariro be esango yonat, azalako. Gixona be jo egi-ten don ta.

— Aitiaren! Au da emakumiaren lotsabakua! Gixona jotzen dodala?

— Bai, bai, jotzen don, egija don.

— Ezton! da laster guzurtauko aut, gonerre peste ori.

Jagiten da bixi-bixi, altzuan daukozan gauzak lurrera bota ta artzeko asti barik, eta inguruban olgetan dabillan mutiko bati deituta.

— Purto, ator ona polit ori, errekadu bat egingo daustak? Neuk sarija emonguat. Juadi etxe-osteko solora, antxe yabik gure Praisku bari-rian, eta esayok datorrala arin-arin ona, neuk esan dodala-ta.

Andik lastertxu agertzen da Praisku etxe-alboko orma-ganian eta bai diño:

— Ze denganiño biar daustazube, barrixuok alakuok?

— Ara Praisku, esaiskuzu ementxe argi ta garbi: Nik iñoz jo zaitut?



— Iñoz bakarrik? Bai bein baño sarrijago be, arrayorrek!  
Entzuten egozan gustijak barre-santsoka estandak egin biar ebezan.  
Gau atan, *seguru be*, Praiskuk ez ei eban otzik ixan bizkar-aldian.

## Tximistargi barrija

(Jazorikua)

Emen irakurriko dozubena lengo urte baten Durango'n jazo zan.

Merkatu-eguna zan, eguraldija illun-illun eguan; emakumetxu bat sartu zan Artekale'ko saloki edo deuda baten, eta ikusirik tximistargi-makatza, apur baten argijari begira-begira egon eta esan eutson etxeko-andreari.

— Ene! Au argien ederra! Egundo onakorik!

— Gustetan yatzu, Ana-Mari?

— ...bai. Polito dao kristalezko bere ontzitxo orretan. Zenbat kostetan da onako bat?

— Bost errial.

— Bat erosiko neuke. Nun saltzen ete-dira?

— Neuk daukodaz ementxe. Gurozu bat ala?

— Bai, iministazu bat. Sekuleko ikarea artu bear daure Kosanton gureak eta mutilek, gaur gabeen argi dotore au imini daidanean gure subetean.

Imini eban argi-makatza polito-polito bere zimeratxuan (zestella-txuan) eta agur esanez juan zan Ana-Mari ona, lau urteko umiak baño gaiztotasun geyago ezaukon emakumetxu zintzuba.

Urrengo merkatu-eguna zanian, orra nun agertzen dan bera Artekale'ko denda artan, eta bai-diñotso etxeko-andreari:

— Ara ba, lengo egunean eroan neban argi-ontzitzua etzan ona ixan edo...

— Ez?

— Neu pozarren eldu nintzan etzera, ta estuen nengoan gaba noz etorriko zan gure gizonok ikaratute izteko, ta esakerea dan lez «nire poza pozure» yoan zan. Imini neban argitxu au ta... len beste illun. Burle egin eusten sano gure gizonok esaten eurela erretzinean alderako eztaola argirik ondioke ta... ene, ene!

— Fundiduta egon ete zan ba? Ekarri dozu bonbillia?

— Zera? Argi citekoa? Bai... ara...

Saloki-andreak artu ta imiñi eban beste makatzaren lekuban, berau kenduta, eta ederto argi egin eban.

— Ikustozu, Ana-Mari, zein polito?

— Andie da gero!



— Zelan imiñi zendun ba?  
 — Nik ba... ortxe daon lez, goiko kuartoeko untze batetik abarkordelaz dingilizke...

— Baña, Ana-Mari, Jaungoikuak parkatu daistala, letrizidaderik ezpadaukozube, onek eztautzube balijo!

Artu eutson ari-makatza saloskari edo denderiak, eta emon eutsozan atzera bost erlak, eta inñun diran atzalgundiak (esplikaziñuak) be egin eutsozan aditu erazoteko tximista barik, edo *letrizidade* barik denderiak esateban lez, etzala gauza argi egiteko etxera eruandako makatza.

Ezeban ezer ulertu, ta len bestian juan zan, edo len baño txartuago, buru-barruban naste illun bat eroyalako.

## Gizon zurrak ondo erabagi

(Jazorikua)

Gixon zurrik ixan ba'da, Mañari'ko Galtzada deitzen yakon ostatu-ko jabia bai-zan bat.

Emen edesiko doguna antziña jazo zan, burdinbidiak asmau ziran aldija baño askozaz lenago. Aldi aretan, Bizkaya'ren zati andi batek Araba eta Gaztelerrrija'gaz eukon saleroste, artu-emon, eta juatetorri gustija Mañari'tik igaroten zan, eta orregaitik, ango ostatubak irabazpide ederrak ixaten ziran, euretan arradaka lez diruba sartzen zala, ostatukuak bidazti-jei abegi ona egin eta mai ugarija ta oe garbija emoten ba'eutsien batez-be.

Orduko aldijetan etzan ezautzen, gure Bizkai onetan beintzat, Txin-detxe edo Banko'rik, eta bakotxak bere lanagaz edo aurreztu al ixaten eban diruba, eskutau egiten eban polito -polito bere etxeko zirkillubetan, emen zati bat eta or beste bat eta an beste bat.

Galtzada'ko ostatu jabe arek be olantxe eukozaan eskutauta urrezko diru pillotxubak.

Morroí bat eukon ostatuban, mutil gaste bizkor ta zolija, lanian zindo-zindua. Arabarra zan berau.

Igande arratzalde baten, erriko jaya zalako edo, Galtzada'ko ta inguruko etxietako biztanliak kale-aldera ziran gustijak, ostatarija ixan ezik. Onek, bere buruba bakar ikusi ebanian, asmau eban diru pillotxu bat sartzia eskutuleku baten. Sartu kortan, sardiagaz eragin alde batera basterre-ko zatz-pilluari, ta lurrian eguan arlau edo losa bat jaso, ta agertu eban eskutulekuba; zenbatu (kontau) ebazan ardura andiz an eukazan urrezko dirubok, eta euroi ganeraturik eroyazan barrijak, itxi eban zuluá arlauagaz, zatza len lez ipiñi eban barriro, ta alde egin eban kortatik eskubei igurdi-ka ta barre-barreka... inok ikusi ezebalakuan.

Baña ikusi eben ondo beste aldeko baster illuneko aska-ganetik begi adikor ta bixi-bixi batzuk. Arratzalde atan, eguberdi ostetxuan, kortako mando ta beste aberiei jatekua askara bota ondoren, arabar mutilla bertan gelditu zan, buruko min piska bat ebala ta uste ixanik kale-aldera juatia baño obeto ixango yakola lo-alditxo bat egitia, ta olantxe ba, korta-baster illunenian askan bigungarritzat ira-besarkada bat ipiñita nasai-nasai etzun zan. Ugazabak ezeban uste a etxian zanik, erriko zelayan dantzan ebilla baño.



Ugazaba kortara sartu ta sardiagaz zatza kentzen abijau zanian itxartu zan mutilla, ta ixil-ixillik egon zan, arnasia be arduraz arturik, ugazabak egin ebanari begira.

Andik egun bi edo irura, morroyak esan eutson ugazabari:

— Zeugaz itz bat egin gura neuke.

— Esaik ba.

— Etxera juateko gogua dodala ta, nire ordezeko bat zuzendu biarko dozula.

— Iru edo lau illabete baño eztok etorri intzala ta, zegaitik ua ba? nire zer-esanik daukok ala? geyago irabazi gura dokala? Ara, gertu naya-gok euk eskatzen daustakana emoteko, aspaldi baten etxuat euki eu lako mutillik eta...

— Ez, zer-esanik eztot; ondo artu ixan nozube, ta irabazi... edonun irabazi neikean beste morroitzan. Baña, neure etxia beti gomutan daukot, neure ama alarguna ta anai-arrebak beti goguan dodaz ta...

— Tirok ba, tirok. Ondo damu yuat ba euk alde egitia; eztok eu leuzintziarren, baña etxakiat eu lako beste bat idoro al ixango dodan.

Egun batzuk geruago juan zan bere errira arabar mutilla, urre-dirutzan zati polita eroyal, ugazabak kortako eskutulekuban euki ebana oso-orosorik. Eskutulekubaren jakitun egin zan egunetik urreguan, goiz-goixetik jagi ta al eban ixillen ibillita, ostu eutsozan ugazabari an eukoizan. Onek ostera, ezeukon orrelako gogorapenik, eta batek baki zenbat aldi igaroko zan a zuluu barriro ikusi orduko.

Bere errira eldu ta laster, mutillak errota edo bolu bat erosi eban, toki egokijan eguana, ta arri barriak ipiñi eta beste tramankulubak barriztau, laba eder bat gertu, ta etxe gustijaki barri-antz andija emonik, asi zan ale (garaun) urun eta ogi-saleroskuntzan. Orrez ganera, erosi ebazan soluak eta oyanak be. Irabazte-arazoetan garratz abijau zan.

Bere errikidiak, ainbeste dirugaz mutilla ikusirik, ikaratu ziran; ba, lau illabete aurrerago itxu bati soñua jo eragiteko txanpon baten jabe etzan, eta ezin ulertu eben zelan atondu zan ain aldi laburrian ainbeste diru egiteko. Asi ziran mar-mar, eta geyenak txarrera jota, oi dan lez, ustia egin eben lapurretan edo beregandu ez ete ebazan dirubok. Bat-edo-batek izparra bialdu eutson, mandazañan bitartez, Galtzada'ko ostatudunari, lengo bere morroi mutillak diru-arazo andijak erabilzala, ta mutil zindo ta ona irudiarren, ezin ulertu ebela ainbesteren jabe egitia morroitzan eta ain aldi txikijan, eta bada-ezpadan jakitun ipinten ebela.

Izpar au artu ebanian: «Arrayo bat!» jaurtinda urduri-urduri jarri zan ostatarija. Urrengo bakar-aldijan arakatu ebazan bere eskutuleku gustijak, eta kortakua utsik aurkitu eban.

— Ederrak emon yeustazak arexek! —egiten eban bere artian ostataria zurrak—. Zelan igarri ete-yuan or diruba eguala? Auxe dok ona! eta orain, zer egin? Bere atzian asten ba'nok epaikarijen aurrian, orra beste buru-auste bat orain daukidanaren ganera, ta ezer egiteko, beste zulo bat utsitu biarko yuat, eta berak eruan daun dirutza ori eztok ixango ez berentzat ez nireztat, idazkixonak (idatz-gixonak) dana jango yoek. Zer egin?... Ardura andiz ta otz-otzian oldoztu biar arazo au...

Egun batzubetan goguan erabilli eban bere morroyaren egitadea, lorik be asko geyago egin ezebala ta jandedan egiteko be leya barik. Gau baten erabagija artu biar ixan eban orraitino, ba goiz-goxetik jagi, ondo gosald, mando bat gertau, eta beronen ganian arpegi argijagaz, trapatrapa, zuzendu zan Araba'rantz Urkiola'tik ziar.

Eldu zan morroyaren erri ta etxera, ta oni, ikusi orduko, esautson:

— A mutil; itz egin biar yuagu bijok eta bakarrian. Etxian gela egokirik ba'daukok orretarako, etxian, eta ezpa'deritxok, beste edozein lekutan, basuan edo...

— Ementxe, errota-osteko gelan sartu gindekez, inok entzungo daukun bildur barik.

Juan ziran ara, atia ondo itxi, ta alkarren aurrez-aur jezarri ziranian:

— Ik niri lapurretan egin daustak, esautson ostatarijak mutillari.

— Bai, ukatu zetako.

— Zelan eta zegaitik ixan dok?

— Ara ba, ugazaba, neuk gura enebala bein ikusi zindudan kortako eskutulekuba agertzen, ete alan jakin neban diru-pillo polita zeukola bertan; axe artzia neure eskuban neukola-ta ziltzan jausi nintzan, ostu neutsuzan urredirubak. Bai-dakit oben egin dodala. Parkatu egitazu obena, ta artu egixuz diru orregaz eroseriko etxe ta lurra eta enparau geratu yatan diruba. Nik ustia bai-neban inoz ordaintzeko ostu dodana, arazuak ondo bai yoadazan.

— Ara mutil, ondo arduraz arturiko oldozpenagaz etorri nok eugana: Nik i salatu ta espetxera bidaltziaz etxuat ezer irabazten, ori lortu al ixateko ba uste yuat ostu daustakan diru gustija, edo geyago biarba, eralgi biarko dodala; i mutil azkarra az, biargiña ta zindua, nire dirubekaz polito abijau az irabazte-arazoetan... Ba, auxe diñuat: Egin yaiguan idazkagiri bat, nik iri palagau auskadazala dirubok euneko bijaren saripian eta i lotzen azala diru ori osuan nire eskubetara bigurtzeko amar urteko epe-





barruban; eta lapurreta onen barri eztaigula jakin Jaungoikuak, euk, eta neuk baño. Zer deritxok?

— Zer deritxodan diñostazu? Gertu nagola ori egiteko, ta zeu zara-la ludijan danik gixonik onena.

— Orretara ezkerro, mando bat artu egik, eta gayuazan oraintxe bertan Gazteiz'era, ziñaltz-idazkarijak geure egijunia atondu dagijan.

Alantxe egin eben. Ain azkarra ixanaz ganera, mutillak bere irabazte-arazoetan zori ederra ixan eban, eta dirubaren sarija ta diruba berbera osorik ordaindu eutsozan bere lengo ugazabari, bera aberaztuta, edo ondotxu beintzat, geratu zala. Bere errijan ezeban iñok jakin mutillaren lapurretea.

Ia, ostatari a gixon zurra ta zindua ezpa'zan!

Bera gixon zar-zurra ixatera eldu zan, eta niri edeski au esan eustanak berari entzun ei-eutson, azaldu barik orraitino nor ta nundarra ixan zan bere morroya; baita be esaten ei-eban agure zoli arek, morroi-ixena ta bijak beti aizkide andijak ixan zirala.

## Baltz euskelduna

(Jazorikua)

Orain irurogei ta amar urte inguru dala, Ego-Amerika'tik Apirka'ko itxas-basterrerantz etorran iru mastadun ontzi ederra; oyalduna, aldi artan itxaso zabaletan ibilten ziran geyenak lakua.

Bilbao'kua zan, eta bere barruko gustijak, onzpurutik asi ta azkenengo txo'raño, bizkaitar euzkeldunak ziran, mundakar, bermiotar, elantxobetar, lekeitiar, ondarrutar, algortar, eta abar.

Sierra Leona ixena daun Apirka'ko alde orretan, ekaitz asarre ta indartsu batek arrapau ebazan. Egun eta gau oso-osuan aixe ta itxaso gogorraz burruka itxela erabilli eben euzkeldunok, baña egiñalak eginarren, itxas-basterreko ondartzza zabal batera jo eban ontzizjak, aixiak eta ugiñak bultzaka eruanda, ta bertan josi yaken, karrakada andi bat eginda birringatzen asi zala. Ezeben ixan astirik txanela bi uretara eratzi ta eurtan arin-arin sartzeko baño, ugiñen sartadak ontzizjoi beriala ausi ta purrukatu eben-ta.

Eguna zabaldua laster jazo yaken gixajo arei ontzizja galtzia, ta an ibilli ziran txanelokaz barregarri goixik geyenian, ondartzeak ipar-aldera eukan ukondo bat arrapau eziñik, itxasuak noz iruntsiko ebazan bildurrez. Ibilli ta ibilli, orraitino, eguberdi-inguruban lortu eben ondartzearen ukondua igarotia, ta aurkitu ziran gal-zoritik azke, leku artan ba itxasuak ezeban ain gogor joten, aurreikara ezetorralako. Urten ziran liorrera aldian eroyen jantzizja baño besterik atara ezebela.

Itxasuari iges-egin eutsoen, baña beste arerijo txar bat agertu yaken: gosia. Ondartzza aren inguru gustijetako lurak elkor-elkorak ziran; etzan agiri an ez biztanlerik, ez abererik, ez zugatzik ez ezer, lur igerra baño. Onak egozan gixajuak! Ija egun bi bai-ziran ezer sartu etzala euren urdalletara ta... a lako maurtuban euren burubak ikusi!...

Gaba bertan egin eben arrausi ta arrausi, ta bijaramonian, itxasua baretu zalako, onzpurubaren agindupian txaneletan sartu ta abijau ziran ipar-alderantz itxas-basterretik. Arratzalde erdijan uartu eben ibai txiki baten iztabua, ta bertara eldurik, ibaya-gora artu eben bidia, norbait aurkituko eben itxarokunaz, edo beintzat, nun-edo-nun zer jan agertuko yakelakuan. Onetan eldu ziran ibaya beste bitan urkultzen zan toki bate-ra, ta antxe egozala asmau eziñik zeñetatik juan, apirkarren txanela antze-





ko *piragua* deitzen yakonetaiko bat ikusi eben eurak egozan alderantz etorrala ibai batetik bera, gixon baltz pillotxu bat ganian ekarrala.

Oneik urreratu ziranian gure euzkeldunak uartu eben piraguan igali asko ekarrela, ta euren gosiak eraginda asi yakezan baltzai didarka ta kiñuka gelditu deitezala adirazoten. Gelditu ziran; bitzuben alkarri bixi-bixi begira jarri ziran; euzkeldunan onzpurubak kiñuka adirazo gura eutsen emoteko igalijetarik zerbait, gosez aulduta aurkitxen zirala ta; baltzok be kiñuka erantzuben, baña etxaken ondo ulertzen esan gura ebena, beintzat ezer emoteko antzik ezerakusen. Onan, alkarri kiñuka inardubela onzpuruba ta baltzok, euzkeldun batek esan eban gogor:

— Zetan gabiltz onetan astija alperrik galtzen! Eldu orrei ta jaurtin uretara, ta kendu or dakarrezan jateko orrek!

— Geldi geldil!... Geu be gixonak gara gero!... erantzun eban *euzkeraz* areitako baltz batek.

Arrituta, kokolotuta lez geratu ziran bizkaitarrak. Onzpurubak gero esan eutsen euzkeldun baltz ari:

— Ezegixube orren esana aintzat artu. Onian deskatzubegu jatekua, ija zutunik egoteko gosiaren-gosez gauza ezkarala gagoz ba ta.

— Neure anayak lez maite dodaz nik euzkeldunak, esan eban baltzak, eta biar dozuben gustija emongo yatzube. Artu ta jaixube, gixajuok.

Eta piraguan ekarrezan igalijetarik emon eutsen euzkeldunei guraña, ta gero:

— Orain guazan nire erritxora, ta an aurkituko zarie zeuben etxian lez.

Ibaitarteko zorrotza igaro, ta beste ibai-adarretik gora jua ziran danak baltzen baserrira. An egon ziran euzkeldunak ederto ainbat egunian; biztanle gustijak abegi gozo-gozua egiten eutsen, ikusirik baltz euzkeldunaren aizkidiak zirala; onek barriz, bere bijotza be emongo eluskijoen biar ixan ba'lebe, bere gogo gustija zan euzkeldunak poz-pozik eukitia.

Baltz euzkeldun zindo arek, ganera, itxasaldeko goyune baten ipiñi eban zaintzallia, ontzirik igaroten ikusten ba'eban ixara andi bategaz ikur-egijon, gelditxeko.

Eta olantxe, nozpaiz ontzi bat gelditu erazo eben, eta bertan etorri ziran Europa'ra euzkeldunak.

## II

Orain, irakurliak itanduko dau Apirkako baltz arek euzkeraz itz-egiten zelan ekijan.

Edeski polita da.

Baltz euzkeldun a ume txiki-txikija zan aldian, gixon zuri bijotz gogordunak juaten ziran Apirka'ra, ta baltzok arrapetan ebezan aberiak ba'litzaz lez, ta gero Amerika'ra eruan an saltzeko. Gixonak gixona orretara erabili! Josu-Kisto'ren irakatsijak ekijezen gixonak lan deunga ori egin edo laketu... Guzurre dirudi baña alantxe jazoten zan. Lotsagarrija Europalo Laternijentzat ori!

Orretariko baltz-arrapaketa baten gure baltz au be artu ta eruan eben Habana'ra, amar urte inguru ebazala bakarrik. Uri ospatsu artan mutiko au erosi eban euzkeldun batek, eta eruan eban bere etxera. Euzkeldun ori eukiduna zan, lugintza anditxuaren jabia. Inge-gozo-arlo andijak ebazan eta bai olea be gozarri edo azukerea egiteko. Ola-onduban eukon bera bixi-ixateko etxe ederra, bere lurrean erdijan, eta bertan eukozan emazte ta seme-alabak. Eurok, ta etxeko otseñak, danak ziran euzkeldunak. Etxe artan etzan beste elerik erabilten euzkerea baño.

Euzkeldun zaldun arek bere idazkelea garbirik eta eraz eukiteko ardurea emon eutsen mutiko baltzari. Au, gustizko esangiña, bizkorra, apala ta bijotz onduna zan, eta bere ugazabak eta bai etxeko beste gustijak maitasun andija ixan eutsen, eta euren arteko bat lez, etxeko lez, artzen eben. Mutiko baltz au laguntzat euki eben ugazabaren mutikuak, eta alkarregaz amaika olgeta egin eben ango basterretan.

Eta antxe ikasi eban baltzak euzkerea, antxe bixi ixan zan bere sendijan lez ogetabost urtera arte.

Orduban bere ugazabak erabagi eban bere sendi gustijaz Euzkadi'ra bixi-ixaten etortia, ta bere morroi baltzari azkatasuna emon eutsen lagijen aurrian, eta onez ganera, dirutza-mutur polita be bai eskura.

Mutillak bere buruba azke ta dirudun ikusirik bere aberrira juateko asmuu artu eban. Euzkeldunen etxian ondo ta pozik egon zan-arren, beti ixaten eban bere guraso, anai -arreba, ta bere jayoternijaren gomuta bixi-bixija. Eta barrero arrapau ta salduko eben bildurrik ezaban, ordurako ba Ingelanda'ko gudontzijak ibilli ebiltzan Apirka'ko itxasoetan, baltz-arrapatzalliak arrapetan, eta samatik eskegiten, eta galerazoten onantxe gixonak gixona aberia lez saltzia.

Ontzigiduko itxastarrei baltzak berberak edesi eutsezan jazokun oneik. Esan eutsen, euri on egiñagaz ordaindu gura ebala zelanbait beste euzkeldun batzuk berari egin eutsen ona.



## III

Or idatzi doguna, baltz euzkeldun orretzaz esan doguna, jazorikua da, ta ez iñok asmaurikua. Itxas-baster atan ontzija galdu ebenak aberrira bigurtu ziranian edestu edo kontau eben an jazo yaken gauza arrigarrija baltz aregaz.

Eta euretariko bati entzun eutsonak niri edestu eustan, eta nik zubei, irakurliak.

On-egintziak beti dauko bere ondorena, gaitz-egintziak lez. Zaldun euzkotar zintzo arek eta bere sendikuak baltz gastieri egin eutsoen ona, ibilli-ta-ibilli, euzkeldunekana barriro etorri zan.

Euzkerea, bere abenda-elia, etxian beti erabiltzetik sortu zan euzkeldunak geruago aurkitzia laguntza ederra Apirka'ko mairtu baten. Olan-txe, irakurlia, gorau egixuz beti zeure aberri-elia, aberri-ekandu onak, eta aberri-ixakera osua, ta egon eskijer, zeure oñordeko edo aberkiden bat-edo-bati on andija etorriko yako ortik.

Norbere oñordekotzako edo norbere erriarentzako on-egintzak bildu ta iztia onuratsugua da on-egintza bako diruak bildu ta iztia baño, lenengo begiradan irudi ez arren alan.

## Jatorrija

Miru-Torre deritxon etxiak bere ate-buruban ikurdi edo arma-arrija dauko, naikua dotoria. Bertan agiri da miru bat egaiz, ollo edo txita-pillo baten ganian.

Torre-etxe onen jabiak arma-arri ori maite-maiterik dauko, berau ba, asaba ospatsu batena da, Don Iñigo Gomez de Orroeta y Sanchez de Munguru zanari Gaztela'ko errege batek emonda, berak egindako gauza asko ta andijen saritzat.

Etxeko areto edo saloe'ko buru-aldian agiri da jatorri-zugatza: Enborrian *Don Iñigo*'ren ixena, ta bere iru semienak lenengo iru adarretan; seme nagusijaren adarretik urtetan dira beste lau adar, ta euretan, bere lau semien ixenak; eta onetara, adarrik-adar (edo belauunik-belaun, lenago esaten zan lez), beti semi nagusijetatik, *Don Kazinto* gaurko etxau-naganaiño; beronen ixena ta bere anayenak dagoz jatorri-zugatza azkenengo abarrian.

Jatorri-kontu au aitatu ezkerro, arro-arrorik asten da Don Kazinto Don Iñigo'ren gorralbenak esaten, bere aldijan gixon andijenetaikua ixan zala, España gustijan ezagutuba, baita Europa'n be... a lako gixonik!... Eta gorralbenen azkena ixaten da Don Kazinto'k esatia bera dala arexen jatorrikua, artez-artez, seme nagusirik seme nagusira; ta edonor eruaten dau etxera bere jatorri-zugatza ikusi dagijan.

Asi yakon bein orrelantxe Etxe-Txiki'ko mutillari. Errijan alogerian ibiltzen zan gixona apal baten semia da. Txikitan alde-egin eban erritik urriñetara biximoduaren billa; ta zurra ta biargiña ixanik, baita be zori onak argi egiñik, bigurtu da errira ta etxera diru-moltso polita aldian daula, eta askok uste ez-arren, dirubek baño geyago balijo daunagaz: adimen landuagaz, jakitun eginda, asko ta asko irakurri ta ikusita.

Onexen aurrian bein asi zan ba *Don Kazinto* bere jatorrija goralduten, eta Etxe-Txiki'ko mutillak dirautso:

— Zenbat malla dagoz arengandik zuganaño?

— Amabi malla. Gixaldi amaseigarren asijeran bixi ixan zan.

— Zeuk eztozu iñoz oldoztu ixango zenbat asaba, edo zenbat aiti-ta-amama ixan zenduzan Don Iñigo orren aldijan.

— Ez, eztot iñoz pentsau orretan.

— Neuk ointxe esangutzut.



Ataraten dauz sakeletik ingi edo papela ta lapixa, ta bertan operaziño txiki bat eginda, diño:

— Lau milla ta larogeta amasei (4.096) aitita-amama. Erdijak aitatik, 2.048, eta beste erdijak amamak.

— Orrenbeste?... Ezin ixan leiteke!

— Bai, Don Kazinto; lenengo mallan *bi* daukozuz, aita ta ama, ez ba? Bigarren mallan *lau*, aitaren aita-ta-ama, ta amaren aita-ta-ama, ez ba? Irugarren mallan *zortzi*, bigarreneko lauen aita-amak. Laugarren mallan *amasei*, ta zuaz aurrerantz onetara, ta ikusiko dozu amabigarren mallan 4.096 asaba dirala.

— Alantxe da. Nok uste olakorik?

— Orra ba, zure asaba ospatsu *Don Inigo de Orroeta* ori *lau milla ta larogeta amasei* tik

BAT ixan zan. Tira, emon daigun Don Inigo'ren andria be ona ixan zala. Eta beste lau milla ta larogeta-amalauak, zelakuak ziran? Ez ete-eguan ainbesten artian deunga edo lapur edo sorgin edo onakorik?

— Begira gero zer diñozun!

— Eztirala danak onak, ez gitxiagorik be, ziur esan daikegu. Eta eztoguz aintzat artu amabigarren mallakuak baño. Ordutik onako malla gustijetakuak, zeure gurasoetaraño, batu ko ba'genduz, 8.190 asaba ixango zeunkez, amabigarren mallaraño. Ainbesten artian gaiztuak asko ixan biar. Ez ete-eben urkatu bat-edo-bat bere egintza madarikatubekaitik?

— Baña eztakigu, bestiarena dakigun lez.

— Jakintzat, Don Kazinto. Urkatuikoen egintzak eta gomuteak eztira jaoten bein be sendi edo pamilietan.

— Eta ekin urkatuekaz!

— Etzaitetz asarratu. Urkatuak diñot gaiztuak esatiarren. Ondo da, Don Kazinto, norbere asaba andi ta ospatsu baten gomutea zaindutia, zuk Don Inigo'rena lez; baña ez arrotu orregaitik, millaka ta millaka jente ezezaunen jatorrija daukogu bakotxak eta, jakixu zelakuak ixan ziran arek! Jatorri-zugatza bestetara egingo ba'litz, norberagandik asi ta atzerantza, sustarrak agirijan ipiñi, ikaratuta geldituko gintzakez zelako jentetxoen jatorrija dogun ikusita. Onetara, sustarrak-sustar urrintxo jatzi ezkerro, uste dot andikijak eta txikijak ezkeunkela alde andirik ixango; aren baten danok.

— Zuk Miru-Torre ta Etxe-Txiki bardindu egin gura dozuz.

— Bardindu? Alderik ba'dago Miru-Torre'na ezta beintzat. Miru-Torre'kuak bixi dira iñok utzi dautsenaz, ez eurak egindako lanaz. Etxe-Txiki'kuak, ostera, eurak ondo irabazirikuz bixi dira. Miru-Torre'kuak,

illargija lez, iñok emondako argijagaitik agiri dira illunian; eurak argirik eztabe, illak edo illunak dira. Etxe-Txiki'kuak ostera, agiri dira edonun, ez iñok emondako argiz euren argiz baño, eguzkija ta ixarrak lez. Beraz, ez etorri nigana destañaz. Zu, jatorriduna, ta ni, jatorribakua, gara; ta orraitik, edozein gixontasun-bidietan zeugaz neurtzeko gertu nago, naiz adimeneko naiz gorputzeko arazoetan; eta orain arte daukoguzan egitadak zeñek geyago ta obiak naiñoz jokatuko dautzut.

*Don Kazintok* alde-egin eban purruztadaka, ta bere etxerantza juan zan, asarez iñuala:

— Gaur egunian ezeri be eztautsoe artzen errespetorik, iñoz ezer ixan eztiranak be geure *parera* eldu gura dabe, dana dago itxulastuta. Ai lenagoko denporak!... Nun ete-zarie?...

Etxe-Txiki'k esan eutson barreka urriñeko aldetik:

— Orrek lenaoko aldjok, Don Kazinto, juan ziran sekulako.



## Alkar aitu obe da alkar il baño

(Jazorikua)

Naparra'ko erri txikitxu baten da, 1876'garren urtian, karlisten oin-tsuengo guda azkenian.

Iturrijak lez, ugari dabilz bertan guda-mutil karlistak, aurreraoko gabeen etorrita, Parantze aldeko Euzkadi'ra igaroteko ustez.

Euretarik ija gustijak gaztelarrak dira; euzkotarrik, banakaren bat ixan ezik, nekez aurkitu lei an.

Diru askorik eztago gudamutil aren sakeletan, baña orraitik jokuan daragoyoe alde gustijetan. Elexaren ondoko zugatz andijaren gerizpian agiri da aldra azitxo bat; bertan dabilz gogor jokuan, «txapeta»-jokuan.

An dira ahenak, didarrak, eztabaida andijak, begirakuna itxelak, eskuba bayonetara eruatiak...! Otsuak «txapetan» jokatu al ba'lebe, eleukie ainbeste urrumada ta agin-erakuste egingo.

Baña zemakun (amenazu) asko ixan-arren ezтира eskubetara sartzen, bertan dagolako euren ollarra, andaluztar sarkento bat, mutil morrosko andija, baltza, begirakun itxalduna, beliaren lumia lakoxe *patilla* baltzak daukozala arpegi-alboetan.

Onexen dautsoe bildur, berau egin da ugazaba, beronek epaya emoten dau eztabaidetan; bere nausitasunaren ikurkija (señalia) an dauko lurrian *sartuta*, arrabete ta erdiko aizto (cuchillo) zorrotza, birrist argi egiten dauna; jokatu gura daunak, beroni emon biar dautso onenbesteko bat.

Joko oni begira dagoz euzkeldun bi, bata markinaarra ta bestia Durango-aldekua.

Ikusirik markinaarrak sarkento ollar arek dirua kentzen dautsela jokalariei, berak jokatu barik, itanduten dautso bere lagunari la zegaitik dan a.

— Ori dok, darantzutso lagunak, *baratoa kobretia*; alan esaten yoek eurok. Inok emon gura ezpa'yautsok, berorregaz bixija jokatu biar yok aitzokadaka. Berori dok itxuraz errimiena orretan, bere bildur dozak, inok eztok azartzen, eta ixil-ixillik egiten yoek bere esana. Inok gura ballok ori *ollartzatik* kendu, beste aizto bat sartuko lieukek beriaren onduan, eta olantxe adirazoko lieuskiok narruba jokatu gura daula ta bere nausitasuna kendu gura dautsola.

— Aiztorik ba'dok or? esan eban markinaarrak.

— Etxaukuat, baña eskatu negijok neure ezagun bati, zer ba? Orretan sartzeko ustia daukok ala?

— Bai mutil! Ementxe gayabiltzak txanpon barik, barrubak uts-utsik ija iru egun onetan, eta ortxe ikusten yuat gosia ilteko bide erraza.

— Bixija galtzeko bide erraza be ixan leitekek.

— Dana dala!... Ekarristak aiztua ta ikusiko yuagu.

Zuzendu dabe nundik-edo-andik aizto eder bat; artu dau markinaarrak, eta sartu, beste aiztuaren onduan. Beingo baten ixildu dira gustijak, mutillari begira-begira dagoz ikaturik, an zek jazo biar daun; sarkento andaluztarra arrituta lez geratzen da unetxu baten, eta beriala, arpegi ta begijak ikaragarriri jarririk, asten da didarka:

— ¡Corro, corro!... ¡Mardita zea!... *Oigasté comparito, oté zabe bien que é lo que ego zenefica?*

— Barriketa gitxi jo niri! esan dau markinaarrak bere aiztua lurretik artu ta bestiaren aurrian jarririk edozetarako gertu.

— *Oté no jabla en cristiano?... ¡Güeno!... Vamoj a vé zé noy entendemo... Zu jakin... ori... zer?*

— Bai, bayakiat... nai bok ementxe, edo nai dokan lekuan...

Andaluztarrak igarri dau aregaz ordago jokatu biar dala, il edo erail egin biar dala, beste biderik eztagola; aren begijetan agertzen dan gogo sendua eztagola atzeratzerik. Orduban, didar ta beso-erabilte ta aiko-maiko andijak eginik, zabaldu dau asko gudamutilen arteko utsunia, ta beronen erdi-erdijan geratzen dira *ollar* bijak; baña aitzokadaka narrubak zulatu biarrian, txutzu-putzu itz egiten dautso andaluztarrak markinaarrari, onek bayetz diñola buru ta gusti, ta gero:

— *Va a zégí er juego... ezte cabayero y menda cobramoj er barato... er que no eté conforme que lo iga, y ze le dará lo zuyo...*

Andaluztarrak ixil-mixil esan dautsona markinaarrari da, alkar ilten ibilli barik, *baratoa* erdi-bana artzia obeto ez ete deritxon, eta bestiak bayetz ba.

Onantxe bildu eben ainbat txanpon euzkeldun mutil bijak. Erri bertatik bigurtu ziran euren etxietara, ta biderako naikua euki eben; Berriz'en alkarri agur egin eutsoenian, azkari (merienda) on bat eginda, ondiño be apurren batzuk banakatu ebezan.



## Or dozu ospia ta betoz diruak

(Jazorikua)

Edonok daki, buru pitin baten jabe ba'da beintzat, ospe onak uste dan baño diru geyago balijo ixaten daula. Ospiaren billa ikusten doguz dabiltzala gixonak euren alegin gustijan, eta ospe ori diruaz erosi al ba'dagije, sarri jazoten dan lez, bape zalantza barik emongo dabe dirua, ta ugari, ospiaren orde.

Arau onek, orraitño, auste bat izan eban, nik orain edestuko dautzubedan jazoeran. Bertan ikusiko dozue ospiaren orde dirua artu zala, ta, pozik artu be gero!

Karlisten lenengo gudatia zan. Naparra'ko erritxu baten, goixeko amaikak inguruan, karlisten Durango'ko batalloya sartzen da. Baida erri-  
jan ugari usubillua ta zaratea; mutikoteri gustija batalloyari bidera urten yako, ta bere aurrian dator urduri; errijan, ate ta leyuak beterik, emakume ta gixonak begira dagoz poz-pozik. Txakurrak, etxe-barruetara añeketan sartuta, bertatik ausika dabilz garratz.

Sartu dira Bizkai-mutillok txairo ta lerden, gelditu dira plazan, beronen lau aldiak euren erreskadaz betetan dabezala, ta bertan, korneta-otsera, lerruak ausi, ta sakabanatuten dira errijan. Erriko nausijak banakatu dautsiezkan okela, ogi ta ardauaz bazkarija atondu dabe, baita irunsi be egundoko ariñen.

Pelota-leku polita dago errijan, eta eguberdi-ostian asi dira guda-mutillak bertan batzen. An dabilz eurak-euretara pelotan. Nastau dira eurakaz erriko gixon batzuk be. Oneik, ikusirik guda-mutil aren artian pelotarako zaletasuna bai-dala, esan dautsie erriko abadia dala eskuz pelotaririk bikañena, ezta agertu ondiño ari irabazi dautsonik.

Au entzunda asi dira mutillok euren artian esaten ez ete leyon ba jokatu abade areri; bai-dagozala mutillak an ederto jokatzen ekijenak; ipiñi egin biar yakola partidua, ta onan. Adirazo dautsie ba erriko gixon arei, abadiari nok jokatu ta nok irabazi bai-dagola, ta gura ixan ezkeru, eurak gertu dagozala.

Errikuak ezin dabe ziñestu ori, ta juan dira abadiagana; etorri da berau be pelota-lekura, ta laster asmau dabe partidua, onantxe: abadia alde batetik eta Durango'ko mutil bat bestetik, eskuz, bijak bardiñan, oge-talau tantura.

Partidua ikustera batzau dira bertan erriko gixonik geyenak eta ija batalloi osua. Abadiak esan dautse guda-mutillai zenbat-nai diru, bi bati jokatuko dautsela; ta onek erantzun dabe, aldiari daroyezan diru apur gustijak batuta jokatuko dabezala. Auxe egin eben: guda-mutil bik batu eben euren lagunak diru gustija, batak zorrotxu baten arturik eta bestiak bako-txarena zenbat dan ingi edo papel baten ezarririk. Amaseiko bat ixan da batu dana. Abadiak bere alde jokatu dauz amaseiko bi.

Pelotakea asten da. Bijak dira onak. Abadiak indar geyago dau, bixi-bixi jaurtiten dau pelotia, batez-be eroso artzen daunian keia ateraten dautso. Bere besagain-jotiak, zelan txalotzen dabez bere erritarrak! *Vaya qué bravico!* diño, erdeldunak dira ba erri artan.

Durangarra azerijagua da. Onek egiten dauna da eutsin eta eutsin, alik gitxien indarrak erabilli, geroko gorde bere indarrak eta bere trebetasun edo habilidadea, bere aurkarija nekatu.

Abadia eldu da amasei tantura, ta mutilla dago sei tantuan ondiño. Oni bere lagunak diñotsoe: «A mutil, zer darabilk? olan ustok irabaztia?» eta berak darantz: «erabiliko yuat.»

Asten da mutilla gustira-jokua egiten, ta indartsu: orma-bijak, ziar-pelotak, itxijak, luziak, orma-urreratuak... joko ederra, ta beti pelotia leku txarrian ipiñi bestiar. Alditxu bat oso neketsua darabile bijak, eta jezarten dira puskaten arnasa apur bat artzeko, abadiak 18 tantu dauzala, ta mutillak 15 eta ataria. Igarten asi da abadia mutilla bera baño geyago dala, edo beintzat, irabaziko ete dautson bildur andija sartzen yako, ta bestelabaitakuan bai-diñotso mutillari, eleukela partidua galdu gura ezetara be, errijan eta inguruetan daukon pelotari-ospia ez galtzarren, eta beraz, irabazten izten ba'dautso, beste amaseiko bi, jokatzen ganera, emongo dauzala, gustira lau amaseiko. Mutillak darantzutso bere aldetik gertu dagola orretarako, baña lagunak jakitun ipiñi biar zituala.

Ixil-mixilka ibilli barik, durangarrak esaten dautse didarrez bere lagunai: «Mutillak, onek auxe ta auxe yñok, zer deritxozube? galdu egingo yuat partidua, ala zer?»

Danak gogo-batez erantzueben: «Galduik! Galduik! Guk ospia zeta-ko bieyuau? Lotuyozak amaseikuok?»

Ituntze edo alkar-aitze au, jakiña, euzkeraz ixan da, eta errikuak ezta-be ezer ulertu, len esan dogun lez napar-erdeldunak diralako anguk.

Durangar-mutillak adirazoten dautso abadiari ba, nasai jokatzeke ta nasai egoteko, partidua irabaziko daula-ta.



Asko gogortzen da abadia orduan; ta bestiak, ezin-antzak eta guzur alegiñik asko erabillirik, amaitzen dabe partidu ori, abadia ogetalaura eldurik, mutillak amazortzi daukozanian.

Errikuak amaika txalo ta gora jo egiten dautsoez euren abadiari; alako bat eztagola Bizkayan esaten dabelarik. Poz-pozik geratu dira.

Guda-mutillak, ostera, ipiñi daben dirua jaso, ta ganera, lau bidar geyago artu dabelako, pozen pozaz praketan artu eziñik dabiz, ospiagai-tik bape ardurarik eztautsela.

Abadia bera be pozik, lau ontzako kosta yakon arren, bere pelotari-ospia zutunik daukolako ondiño.

Orra danok pozik, arazo baten danak pozik gelditzia gauza eziña dala esaten dan-arren.

## Azerijari azerija

Bere etxiaren ortuko txoko edo baster baten zoratuta lez ebillan Anton Berakatz, urrumaka, esku bijakaz buruari elduta. Illarrak lakoxe negarranpuluak begijetatik jausten yakozala, atzera ta aurrera iñun geldi ezin egonik, zein da lurrak erre baileutsozan bere oñazpijak; eta intziri ta urruma bitartietan erdi-tartaka min motelaz esaten ebalá:

— Ai ene bada ta ni!... Ai nire errukarrija!... Zetarako nago ni orain munduan?... Neure Jaungoiko laztan Aita ta Seme ta Espiritu-Santua, Ama Birgiña bijotz beria ta errukiorra, neure ixeneko santu Antonio miraritsua, ta zeruko santu-santa gustijak!... Arren!! Erruki zakidaze ta lagundu eistazue neure ordu gorri ta larri onetan!... Zein txakur izan da nik emen ain ondo gorderik neukan okela-zatija sumau dabena?... Nor arrayo, bai, nor milla arrayo ixan ete-da niri emendik diru biribil polit ederrak ostu daustazana?... Ainbeste urtetan apurka-apurka ta nekiaren-nekez aurrezturiko eun ogerleko zuri ederrak, nun ete-zagoze?... Esake-rea da osturiko gauzea bere jabiaren dei egoten dala... baña nik eztantzut iñundik be deirik... al banentzu!... laster niñuake zuekana, ogerleko mai-tiak, ollo lokea bere txitakana baxen agudo!... Milla ta bosteun tximistak birrinduko al abe, lapur deunga zital madarikatua!!

Esakune onekaz atara-bidia emon eutsonian bere atsakabe ta asarriaren lurrunari, nasaitu yakon zerbait bere barruba, ta jezarri zen iko-zugatz baten azpijan, eta ordurarte baño arte geyagogaz asi zan gogoketan:

— Zoritxarreko nire arazo au ezta zarataka zuzendutekua; ixi-ixillik eta bestela-baitakuan atrapa biar da, atrapatekotan!! nire dirubekana eldu dan azeri zarra... nor ete-da bera?... un!... eingo neuke orixe geure alboko belarrimotza ixan dala... demoniñua!... oixe ixango da bai!... orren etxeko tellatupeko leyotik agiri da dirubak gordeten nebazan tokija; iñoz ikusi egingo ninduben orrek lurrak aztertu ta ogerlekoren batzuk antxe ipinten ibilli nazanen baten... bai! orixe da... berori da bai... ziu.

Arnasa luze bat eginda, esker aldera gorputza okerturik ipiñi eban luze-luze eskumako ankea, ta beronen praka-sakeletik atara eban toxa edo tabakorri-ontzija; zabaldu berau ta artu eban barrutik zigarro-papel liburutxu okertu ta tximurtu bat, kendu eutson orri bat eta ipiñi eban dingiliz beko ezpanetik; itzuli eban gero eskerreko eskura zigarro batentzako lain tabakorri, ta ganian eskumako eskura jarririk erabilli ebazan apur baten esku bijak errotarrijen antzera; biribildu eban gero taketa lakoxe





zigarro lodi ta gogor bat; eta eskerreko praka-sakeletik ardaya, galtzairua ta subarrija atara, ta, kaisk-eta-kaisk, zati baten inñardun eta gero, ixitu eban ardaya, ta onegaz zigarrua, pautadaka, ta musturra luzatuta.

Zigarrua egiteko ta berau ixituteko biar ixan ebazan tresna gustijak gorde eta gero, ipiñi ebazan besuak gurutzetuta belaun-ganetan, eta pauta ta pauta, beti-be zigarruari ke moltso andijak ataraten eutsozala, zati baten geldi-geldi egon zan, aurre-aldeko arri koskor bati begira-begira. Arrayoren bat aginartian esanda jagi zan noz-edo-noz, ta alde egin eban andik Anton Berakatz'ek, belarrimotzaren etxerantza begiratuta esanz:

— Ikusiko yuagu ba nor nor garian.

## II

Dirubak ostu eutsonian egunetik aurrera, innoz baño kantarijago ta argijago ebillan Anton Berakatz, batez-be auzoko belarrimotzagaz; onegaz barrukotasun andija artu eban, eta barriketaldi luziak ixaten ebezan alkarregaz, antxiñeko aizkide ta lagun zarrak ixan ba'ltizaz lez.

Gau baten, apalduta gero, ate-onduan preskuran, sillia atzerantza orma-ondora eginda, bere oñak aurre-aldeko gorengo zotzian ipiñita, beso-utsik eta eurok eunduta, burua orman, eta ezpanetan zigarro-mutxikin bat ebalá, *Sanchez* belarrimotza *petenera* bat agin-artian kantetan inñardubala, eldu yakon Anton Berakatz eskubetan silla bategaz, ta bere onduan jarten zan artian esan eutson:

— Kaixio Txantxes, gau-aro ederra dago.

— Ola Berakatzá, ederra gaba.

— Eta... zer diñoe ba papelok?

— Gitxi gauza. Bilbon bankero bat egin kiebra, eskapau Amerika'ra, palmo bat sur itxi akredoriak.

— Artzekodunak ago-bete agiñegaz geratu dirala esan gura dozu, ezta?

— Bai, ori.

— Neu enindukie arrapauko orretariko banko ta drogetan; ez, ez, diruba norberak gorde.

— Bilboko Banko edo España'ko Banko edo *Caja de Ahorros* eztago bildur, gizona.

— Baña Txantxes, norberak eukitia da onena, ezteritxozu?

— An be seguru egon, eta ademas interesa artu. Etxian lapurrak sartuta...

— Ez euki etxian! beste leku baten baño. Nik neuk beintzat aurreztu ixan al dodan diru apurra, ondo gordeta daukot, inñok jakin ezin daiken tokitxu baten.

— Bai? Asko diruak e, Berakatzá? (*Este no sabe nada*).

— Asko ez, zugaz baidot ziñestasuna, ta esango dautzut eun ogerleko daukodazala toki orretan. Lengo egunian salduriko txalaren ogetabost ogerlekuak be, bijar artuko dodaz ta antxe ipinteko ustia dot. Korridurik ezot artuko, baña eztaust ardura; Banko baten ipiñi ta gero... ez korridu ta ez diru barik geratuko ete-nindeken bildurrez lorik be eneuke egingo ta...

— Bai Berakatzá, asko arrazoya euki zu. (*Rediez, hay que animarle*). Poblaziñoetan pillo asko egon, aldeanuak engañau, atara diruba, esan interesa emon, gero dana artu dozu eurentzat, egin kiebra ta bapez itxi zuri. Bai, Anton, gorde ondo dirua (*para mí*).

— Bai ba; urtiak dira así nintzala dirua gordeten alantxe; ta bijar edo etzi ogetabost ogerlekuak ipintera juango nazan lez, innoz diru-zati bat ipintera nuanian bakarrik begirutzen dautset; nasai-nasai dot neure gogua, ezeren bildur baga, seguru dagolako.

Apurtxu baten barriketan egonda gero, alkarri gabon esanda alden du ziran baxotxa bere etxera. *Sanchez*'ek, ogeratu orduko, abots zorrotz-zorrotzagaz *malagueña* luze bat bota eban bere etxe barruban, eta Anton Berakatz'ek inñuan:

— Pozik abil.. jausi biar dok urrian.

## III

Bijaramonian, bere ortuko txokuan zoro-zororik ebillan Anton, artazika dantzan zaitu biarrez; jaurti eban santso bat, iru killometroen inguru-barruan entzun ixan ixango zana. Ak eukan poza!Eukiteko zan; eguna zabaldu orduko jagita, juañ zan bere diruen gordelekura, ta... antxe egozan eun ogerlekuak, *Sanchez*'ek gau artan ipiñita, txalaren ogetabostak be artzeko ustian.



## Biarrak biarra eragin

(Jazorikua)

Bizkaï'ko baserritarren esakera oni deritxot egokijena *Abar* onen burutzat. Jakiña da Bizkaya'n lanari *biarra* esaten yakola; beraz, esakera orrek diño: biarrak, edo biar-ixanak, lana eragiten daula.

Gastetxua nintzala (18 urte) Madrid'era neure ikaskuntzak asteko eldu nintzan-egunetan, bixi-bixi gomuta dot, illuntze baten bertako «Café de la Iberia» (Carrera de San Jerónimo) akeitetxian ikusi nebala neu baño seien bat urte zarragua zan mutil polit, argi-argi, gustiz begikua, bere lagunei alde-agurra egiten, bere aberri Euzkadi onetara etorralako bere karrera amaituta.

Txera andija egitsoen danak, pozarren erakutsoen euren zorijon-opea, etzan besterik entzuten: «Ori da mutilla, ori!», «mutil adimen argi-duna», «oso lagun-artekua», «lagun maite korra», «biargiña», eta onelako esakerak baño. Bertan aurkitzen ziran gustijak alkarren leyan ebiltzan axe mutilla goralduten. Neure ezaun bati itandu neutson ia nor zan a mutilla, ta erantzüstan:

— Mutil orrek bere karrera zelan egin daun ba'zenki, ikaratu egingo zintzakez.

— Pozik entzungo neuke, ta iñora juan biarrak ezpa'dozu, arren edestu egistazu (esan neutson nire ezaun ari).

Orra ba: mutil ori gipuzkoarra da, ain erritakua. Bere gurasuak ogasunetan ondotoxo dagozanak dira. Adimen argi-argija dau mutil onek, zurzurra da, ta batxiller ikastaldijan beti goiengo mallea, *sobresaliente*, arrapateban, urtian-urtian sarija bereganaturik. Batxiller-agiri edo titulua be dubarik atara eban. Jakiña da, bere gurasuak txotxatuta egozan beragaz.

— Egoteko da, orrelako seme bat euki ezkeru.

Eta ikasten zolija ta azkarra ixanaz ganera, mutil au zan ekandu onak ebazana, etxeratua, esangiña... ezeukon akatsik.

— Zein karrera egin dau?

— Osakigiña edo botikarijua. Aitak ekarri eban Madrid'era lenengo urtian, ostatu-etxe on bat idoro eutson, eta aizkide bankero bategana mutillagaz juanda, beronen aurrian esautson ari

«Ikastaro edo curso'aren amayeran kontuak egingo doguz, eta artian, beronek eskatzen daun beste diru emongo dautsozu oni.»

Bankeruak adirazo eban, ori geyegi ixango zala, biarba, gaste baten-tzako, ta aitak erantzutson:

«Eztago bildurrik, neure buruagaz baño ziñespen geyago dot beronegaz.»

Alan utzi eban mutilla Madrid'en, bere-buru zala, ta diruba noz-gura atarateko eskubidiagaz.

— Arranua! Ego andijak dira orrek...

— Andijeyak. Gastia zan lez, mutillak ezeukon dirubaren maitasunik eta eskubetatik igarri barik juaten yakon. Ain barik geratzen zan bako-txian, bankeruagana juan, eskatu, artu ta kitu. Lenengoetan lotsatzen zan piskat; gero, ekanduban sartu zan apur-apurka, ta erruki barik eskatzeban diruba. Andik illa bigarrenko, andiki bat lez bixi zan. Jakiña, ikastiak asko galdu eban biximodu ain ederragaz.

— Eta ustel atarako eban biarba azterketetan.

— Ez ba. Bere ikaste-atalak (asignaturak) ondo atara ebazan, baño ez goirengo mallan, batxillerian lez, berengo mallan baño; ozta-ozta ondo urten bakarrik. Ikastaro gustijan dirutza andija eralgi eban; berak ezekijan zenbat, bein be ezeban inungo ingi edo idaztitan jarten banke-ruari eskatzen eutsona. Diru asko zala baño ezekijan, asko. Juan zan etxera, ta an bere aitagaz jazo yakona sarritan berak edestu dausku.

— Bekoki ederra ipiñi ixango eban aitak urteko gastuen kontua ikusi ebanian.

— Etxera elduta, bildurrez ei-ebillan berau, itxaroten noz aitak artu-ko ete-eban zarataka.

Andik lastertxu aitak bere idazkelara deitu ta esan ei-eutson:

«A mutil, Urlija jaunak (bankerua) bialdu yok urteko ire kontua, ta oker egon biar yok, ainbeste ezin ixan leikek. Idazten nayuak berari kontua barriro egin dayala; baño idatzi orduko, itandu egin gura dauat. Ara bere ingija. Zer diñok?»

Eta mutillak esautson:

«Nik eztakit zenbat dan, eztot erabilli konturik eta. Berak ori ipiñi ba'dau, egija ixango da.»

Aitak au entzunda bai-diñotso:

«Konturik erabilli ez arren, gitxi gora-bera gomutauko dok orraitioño aldi ezaunetan zenbat eskatu euan. Esaterako, emen yagozak Aratoste-egunetan eskakixun bi, bata milla laurlekokua ta bestia bosteunekua.»

«Bai, ori egija da», esan eban mutillak apal.

Aitak orduan igarri eban ezeguala okerrik bankeruaren kontuan, eta esan eutson semiari otz-otzik, ezer jazo ezpa'litz lez:





«Orixe jakin gura ixan yuat. Onek etxaukok ordaindudia baño beste-rik. Tirok, juan aiteke.»

— Gixon otza da benetan aitori. Beste askok bere lekuan, a zelako agirakak! eta agiraketan bakarrik geratuko elixakezanak ez gitxi.

— Mutillak uda gustijan ezeutson ikusi aitari asarriaren izpirik be. Arrituta eguan. Eldu zan Iralla'ren azken-aldia; urrengo illaren lenengo-kuan ikastarua asi oi dan lez, aldi orretantxe juan oi dira ikasliak euren ikastetxietara. Gure mutil au bere aitari Madrid'erako juatia aipatuten bildur ta lotsa zan; baña esturan, illaren 25'g. eguna eldu zanian, lotsaka ba'-zan be, zuzendu zan aitagana, ta:

«Aita, onezkero bost egun baño eztaukodaz matrikulak egiteko, ta Madrid'era juan biarko dot.»

«Bai, ene semia (esautson aitak) matrikulatu biar ba'dok erreski an ibilliko az.»

«Orduan, ba'deritxozu, gaur arratzaldeko trenian urtengo naz.»

«Euk nai dokanian.»

Mutil orrek poz-pozik gertau ebazan pardelak, eta barriro aitagana juanda dirua eskatu eutsonian biderako-ta, aitak erantzutson barreka:

«Dirua nik iri emon! Lotsarik ba'dok eske etorteko, igazko ikastaruan bost milla laurlekotik gora ostu eustakazan ta? Ez, ez, nire dirurik eztok ikusiko.»

«Orduan, zelan juango naz ba? zelan bixiko naz an?»

«Ori eure ardurea dok, or konpon.»

«Baña orretara karrera laga biar.

«Laga edo utsin, euk egingo dok nai dokana, or konpon adi. Neu bixi nazan artian beintzet eztaukok nire txanponik.»

Estutu zan mutilla onegaz, ta zolija zan lez, laster erabagija artu eban. Bere ama, ixeko, osaba, aizkide ta enparauak diru-eske arakatu ebazan, amabost-ogei bat ogerleko alan baturik, eta bijaramonian Madrid'era etorri zan. Lenengo aldija txarra igaro eban, baña biarrak biarra eragin eutson. Botika-mutil jarri zan, eta ganera, ostatu edo ponda bateko idazkigintzea (correspondencia) bere gain artu eban, eta onetara, atarateban naikua jan ta janzteko baita bere ikastiak egiteko biar ebazan liburuak eta erosteko be. Onantxe, egun gustija zereginez beteta eukirik, ezeukon txarrerako astirik, eta asko zindotu zan. Bigarren ikastarua amayeran, batxiller-aldiko mallak barriro arrapau ebazan. Lenengo ikastaruan estalduriko lengo mutil zoli adimen argiduna ta era batez ikasi-zalia barriro agertu zan.

Balijoko mutilla da orrait.

— Bai ben! Beronek egin ebana ikusita, amak eta ixekuak eta senitarteko enparau emakumiak eskatu eutsoen aitari, lenguak aztu ta lagun-du egin biar yakola mutillari.

«Gixajua (esateben), aurten ak egin daun lana, bere ikastiak sobresaliente'gaz amaitu, ta bixi-ixateko biar ixan daun gustija berak irabazi, etxetik txanpon bat bialdu etxakola; arito aulduta egon biar gixajuak.»

Baña aitak erantzun barreka: «Bai zera! lengo urtian ipini gendun mutilloi zer-nai ta axe eukola, eskura dana emonda, ta polot egin euskun; aurten, ezer emon barik, bizkortu da ta goitik jarri. Zein da biderik onena? Esan biarrik eztago. Kirten osua ixango nintzake ta semiari kalte andija egingo neuskijo, orain daruan bide artez ori ausiko ba'neutso. Ezolakorik!»

— Zuzen eguan aitori bai..

— Emakumak otoika ta asarreka ta negarka ibilli jakozan, aita gogor eguan, ezin ixan eben bigundu, ezeutson semiari dirurik bialtzen.

Eta mutil azkar onek karrera gustija onantxe egin dau: berak bakarrik, etxeko laguntasunik бага, ta ederto, beti goiko malletan; osakigin-agirija be, batxillerreku lez, dubarik atara dau sarija irabazita.

— Asko balijo dau bai mutil orrek, beroi lakuak ondo urri ixango dira; baña bere aitak be balijo dae.

— Mutillak berak diño aitari zor dautsola dana; bigundu ba'litz, eta dirua emoten asi ba'litzakijo biarba bide txarrera barriro jota, ezebala gauzonik egin ixango.

— Orain danak pozik.

— Mutillak esan dauskunez, aitak jakin eragin dautso gertu dagola biar dan dirua emoteko mutillak gura daun tokijan edo urijan osakitegi (farmacia) gorengotaiko bat ipinteko.

— Edesti polita da.



## Ardao-zaliak poltsia galdu

(Jazorikua)

Burdinbidiak asmau baño lenago, Bizkaya'ren zati andi batek (Bermeo'tik Ondarroa'rañoko itxasaldian, Gernika ta Markiña-aldiak, Zornotza ta Durango-aldiak) Araba ta Gaztela-aldiekaz euki oi eban sal-eroste, artu-emon ta juan-etorri gustija Durango'tik Gasteiz'era duan bidetik egiten zan, Urkiola, Otxandijo ta Legutiano (Villarreal) ziar.

Orduko aldijetan bide orretatik oñez, mandoz, zaldiz ta burdiz, atzera ta aurrera, gustiz ugari ibiltan ziran notiñak. Urkiola'tik Legutiano'ra bitartian, bitxabalaren alde bijetatik urriñeraño, oyan edo baso sarratu zabal andijak egozan, eta orain baño askozaz etxe gitxiago. Oyan andi orreitan ugari eskutaten ziran basalapurak, eta al eben aldi gustijetan bidera urten, bidaztijak gelditu, eurekaz eruan baso-barrura biar ba'zan, eta, jakiña! aldian txanpon barik izten ebezan murri-murri.

Aldi aretan gorda-zibillik ezeguan, baña bai-egozan mikeletiak bidiak zaintzeko. Oneik geyenetan bidez-bide ibiltan ziran lez, ondo zainduak izaten ziran. Lapurrak beti jakiteben mikeletiak nundik nora ebiltzan.

Orregaitik, mikeletien uste andirik euki ez da, burdidunak alegintzen ziran alkarregaz batera ibilteko, alan indar geyago egiñik lapurrai aurre emon al ixateko. Sarri ibilli oi ziran alkarri tiroka lapurrak eta burdidunak.

Egija da, beti-be, lapurretak asko ta lotsabakuak izaten ziranian, eta batez-be, notin ezagun edo andikijen bati ostuten ba'etsoen, etorten ziran mikeletiak indar andijagaz, alik ziatzen arakutzen ebezan baso gustijak, lapurren bat edo beste il edo arrapau, ta enparauak uxatuten ebezan urriñetara. Orretariko garbi-aldi baten ondoren bake geyago izaten zan bidietan; baña gero, apur-apurka, bat orain eta beste bat gero, agertzen ziran barrero lapurrok, eta ibilli-ta-ibilli, azkenerako lengo moduan.

Eta gauza uagarri bat: naiz Durango-aldekuak ixan, naiz Arratia'kuak, naiz Orozko'kuak, naiz Larrabetzu'kuak, naiz Bizkai'ko edozein aldetakuak, berrialaxe ikasi ta erabilten ei-eben gipuzkerea (Gipuzkua'ko euzkerea). Euren izkeratik danak kiputzak ei-irudijen. Ori ixango zan, gure ustez, urriñekuak zirala ziñestu erazotiarren.

Guk zarrari entzunda dakigunetik, Napoleon'en gudadetik karlisten gudaterarte ixan ei-zan lapurraldi itxela. Eulijak baño ugarijago ei-ebiltzan. Azkenerako alkarren aurka jarri ziran, danentzako beste zer-ostu

ezegualako, ta burruka ta zarraparra askotxo euki ondoren, iru edo lau aldratan banatu ziran, aldra bakotzak eukola bere mendian bidiaren zati bat antxe lapurretan ekiteko; ta aldra orreitakua etzanari ezeutsoen izten an lapurretan egiten. An etzan laketzen lapurrik euren aldretookua baño.

Lapurren artian iñun baño agintari-biar geyago ixaten da; ta beraz, aldra bakotxian buru edo nagusija eukiteben, eta onen urrengo beste malla bat egiteben bik edo iruk, bere barrukuaguak ziranak, eta enparau gustijak egiteben berengo mallea, «lapur lauak» esango ba'gendu lez.

Oneik aldrek, geyenetan, onetaraxe lan egiteben euren lapurrerijetan: lapur lauak edo berengo mallakuak jarten ziran or-emen bitxabala jagoten, batez-be biar-biderik asten zan tokijetan, gelditu erazoten ebezan bidazti gustijak, eguan baso-barrura, lotu antxe zugatz-enborrai; eta onan batzen ebenian talde azitxua, etorten zan eurakana aldra-buruu zan lapurra, manta bat zabal-zabal ipinteben lurrian, bidazti arrapatuei agintzen eutsien botateko araxe euren poltsak, eta gero arakatuten eutsiezan ondo euren sakelak eta jantzijak badaezpadan.

Onetara lumatuta gero, edontzi edo baso-betena ardao eskiñi ta emoten eutsien ostutakoei, atsakabia zelanbait arinduteko edo.

Lapurrak onetariko ekandurik iñun daukenik, edo euki dabenik, eztozu entzun sekule. Antza danez, onetantxe be, lapur izaten be, euzkeldunek berarizkuak ixan dira, euren antza ta ez iñorena euki dabe, iñor ez lakuak ixan dira.

Ardaa eskiñi diruak kenduta gero!... Asmakixun errukorra!... Beste leku batzuetan dirubakaz batera bixija be ardura asko barik kentzen ei-dabe.

Bai, antxe lapur-tokijan polito-polito eukiten ei-eben zaragi ederra (au be ostua ixango zan, zer esanik eztago) bere astotxuan dotore.

Ba, onakoxe aldi baten, bidazti-taldia batu ebenian, eta poltsak eskatu eutsezanian, eta gero sakelak eta jantzijak ziatz arakatuta, ardaa emoten asi ziralarik, jazo zan gauza barregarrija, ara:

Bidaztijan artian eguan aguretxu bat txiro jantzita, buruan tximela ebalu, aldi aretan oiturea zan lez; berau etorren Legutiano'tik, an eukozaan etxe bijen urte-sari edo errentak artuta; poltsak botatia agindu zanian, beronek esan eban ezeukola ezer, bera txiro bat baño etzala; sakelak eta jantzijak arakatzia ixan zanian be, ezeutsoen ezer idoro; ezeutsoen ezer kendu ba; ardaa emotordua eldu zanian, lapur bi asi ziran alde banatatik pitxerkada-ardaua ta edontzijak eroyezala, edontzija bete ta emon bidazti



bakotxari; aguretxuaren txanda edo aldija ixan zanian, lapurra aurrera igaro zan oni ardaurik emon бага, ta au ikusi ebanian aguriak, ardao-zalekerijak jota, esan eutson:

Lapur *jauna*, niretzako eztago ardaorik ala?

Lapurrak orduan emon eutson belarrijan itxulijetako bat, esanaz:

Lapurra... ta *jauna*? Or dezu ori ba!

Zartadeaz tximela burutik lurrera bota eutson, eta antxe agertu zan aguretxuaren poltsia. Gixajuak antxe eukon polito eskutautu, eta ixan ezpa'litz bere ardao-zalekerijagaitik ezeutsoen kenduko. Jakiña, agertu orduko eskua ezarri eutsoen lapurrak poltsiari barreka, ta orduantxe bai eskiñi eutsoen ardaa, esanaz:

Oraintxe bai emango zaizu ardua gogo onarekin. Ar zazu, aitona, ar zazu.

Agurea negar baten eguan eta ezeban entzun gura ardauren ixenik be. Bera negarrez eguan artian, lapurrak eta beste bidazti gustijak barreka egozan.

Zalekerijak eztakar bein be gauza onik eta.

## Atxuri'ko «millagua»

(Jazorikua)

Emen edestuko doguna jazo zanetik ona urte asko igazi dira.

Orduan Bilbao'k ogei milla inguru biztanle baño askoz geyago ezebazan. Geruago Begoña'ri artu dautsozan zatijak ezeukoizan ondiño. Abando be azke zan, erri banakua.

Beraz, Bilbao erri txikija zan, eta biztanle gustijak alkarren ezaunak ziran. Ezeguan orain dagon beste *guardia municipal*, naikua ziran iru edo lau txiñel errija zaintzeko, gabezko *sereno* kantari batzukaz.

Onelako erri baten aituten da erraz egin leitekela emen edestuko dogun barrabaskerija, erri gustija barre baten ainbat egunian euki ebana.

Bilbotar barregarri batzuk iragarri eben bertako izparringi baten, eztaikit nungo erritan il zala atso aberatz bat, eta milla ogerleko batzuk utzi ebazala Bilbao'ko erren edo kojoei bananduteko, atsua be errena ixan zalako ta Bilbao'n jayua; diru ori bananduko yakela Atxuri'n, etxe bateko atarijan, bertan aurkeztuko ziran erren bilbotarrai, onen egunetan eta onen ordutan.

Bilbao'ko txiro ta gosakillen artian ikara andija eragin eban iragarki orrek, eta egun batzuetan etzan ixan beste izketagairik auxe baño.

Eldu zan eguna. Atxuri'ko etxe aretan agiri zan atarijan mai bat, beronen ganian tintontzija ta ingijak, iru jezarleku, basterrian zorro batzuk zerez edo arez beterik, eta iru edo lau gixon, piperra baño seriyuago, alkarregaz izketa ixiltxuan, atarijan batera ta bestera ibilli ebiltzala eperdi-ganian eskuak alkartuta.

Goitzxo asi ziran kojuak agertzen kalia. Geyenak etozan makulu bigaz ta anka bata dingiliz; bai-ziran etozanak eperdi-ganian erdi-tatarrez; baita burtxoyetan etozanak be iñok bultzaka eruanda. Danak zurbil eta arpegi aulagaz, edonor errukituteko lez.

Iragarrita eguan ordurako, kale gustija aurkitxen zan errenez beterik.

Balkoyetan eta leyuetan eguan jentiak arrituta esateban: «nok uste ixango eban Bilbao'n onenbeste koje eguanik?»

Atarijan egozan gizon seriyuak adirazo eutsien kalekoei diruak gertu ipiñi biar ebezala ta orregaitik piskaten atia itxiko ebela, ta asko belutu barik, laster asiko zala diru-banandutia. Itxi eben atia ba, ta gerotxuago barrero zabaldu zanian, tximista baño ariñago urten zan andik, zer uste dozue? Zezentxu bat!!Nok azaldu an ixan zan usubillua? Asi zan zezen-



txua topeka, au bota ta ori bota, ta, ango añeketia kojuak ixanarren!  
Egundoko ariñen, miñuto bat baño lenago, garbitu zan kalia, makillaz ta  
burtxoez beterik gelditu zala. Millagrua ixan zan. Zezena agertu zan ordu-  
ko kojo gustijak osasunera etorri ziran.

Balkoi-leyoetako jentia, barriaren barriaz tripa gustija minduta gera-  
tu ziran.

Diabrukeri au ikusi eben bilbotar zarrak barre-zoroka asten ixan  
yakuz berau aitatu dogun aldi gustijetan. Amaika gixon gogaldi ederreko  
jayo ta bixi ixan zan lenagoko Bilbao'n!